

ምጅልስ አቅሊም ቅብለት በሐር ቀየሕ 16^ይ ርቱብ እጅትምዑ ሰርግል

ምጅልስ አቅሊም ቅብለት በሐር ቀየሕ 16ይ ርቱብ እጅትምዑ ሰርግል

ምጅልስ አቅሊም ቅብለት በሐር ቀየሕ “ብሃ ወወግር እብ ሸቅል” እብ ትብል ሰቅራት፡ ዲብ ዮም 20 ወ 21 ፌብራይር እት መዲነት ባጼዕ 16ይ ርቱብ እጅትምዑ ሰርግል።

ርኢስ መጅልስ አሰይድ እብራሂም ዐሊ ሼክ ዲብ አስምዐየ ከሊመት፡ ባይኣመ ለህሌነ ናይ ሰላም መርሐለት ወመትረፋዕ ምን ዐድል በረ ላቱ መኔዕ ፍገራት መዳፍዐት ሸዑብ ኤራትርየ ወሚርሐቱ ክምቱ እንዴ ሐበረ፡ እብ ሰሙድነ ወመዳፍዐትነ ለበይኣናህ መርሐለት ሐዳቤ፡ ናይ ዐማር ወዐቦት መንገዳት ካስተት

ሰበት ህሌት፡ እብ ፈዛዐት እግል ንትነፋዕ እብ እብ ዕጹፋት እግል ንክደም ክም ወጅብ አፍህመ።

እዳረት አቅሊም ህይ ዲብ ሰነት 2019 እት ናይ እጅትማዕየት፡ ብንዩት ትሕትየት፡ እቅትሳድ መጃላት ናይለ ትሰርገል ወራታት ተቅሪር ትቀድም እት ህሌት፡ እብ ሙሽርተክት ተህደገ እቱ።

ሓክም አቅሊም ቅብለት በሐር ቀየሕ ብርጋደር ጀነራል ተክሌ ልብሱ እት አስምዐየ ከሊመት፡ ዲብ ሰነት 2019 ዲብ አቅሊም እብ መዓወነት ወመሻረከት ሸዑቤ መአሰሳት ሕኩመት፡ ጀብህት ለትሰገለ በራምጅ ዕዉት ክም ዐሊ እንዴ ሐበረ፡ እትለ ጸብጣመ ለህሌነ ሰነት እት አቅሊም መሻርዕ



ዐማር ዐባዩ እግል ልሰርገል ሰበት ቱ፡ ሸዑብ ክም ዲመ ዲብ ሰርገሉ መሻረከቱ እግል ለአዚድ ትፋነ።

መጅልስ እት ደንገቤ ተኸጢዋ ለኢትዳላ እግሉን መዳይን እግል ልትዳሌ እግሉን፡ ሸዑብ ለነሰኡ

መባደራት ዐማር እግል ልትናየት እብ ክሎም ለክሰሶም ጅሃት ሕኩመት ወእንፋር መጅልስ አትፋዝያት እግል ልግባእ፡ እቲይ ዐማር አቅሊም ደራይብ ሕኩመት እብ ዋጅብ ልትጀማዕ ሰበት ኢህለ፡ እብ ተአሰትህል እግል ልትከደም

እቱ፡ መሐገዝ ማይ ምዴርየት ዳህላክ ሐል እግል ልርከብ ለትጸበጠ በራምጅ እግል ልሸፈግ፡ ዲብ ተአፈርህ ደረጀት ለህለዩ 66 መድረሰት አትሳናይ እግል ልግባእ እግሉን ለልብል ውበዕድ አረኢ ትቀደመ።

ሳወ፡ መድሐራት ደረሰ መርከዝ ተድሪስ ወመዳርስ ፈንዩት

ምን መርከዝ ተአሂል ሙደርሲን ወመዳርስ ፈንዩት ሐቀ ትደሐረው፡ ዲብ 33 ደውረት ክድመት ወጠን መደት ሰለ ወርሕ ተድራብ ዐስከሪ ነስኦ ለጸንሐው 766 አንሳት ለብእቶም 1681 ሸባባት ዲብ ዮም 22 ፌብራይር ትደሐረው።

እቲ ዲብ ሳወ ለገብኣት ዓደት ቃእድ መርከዝ ተድራብ ቅዋት ድፋዕ ኤራትርየ ብርጋደር ጀነራል ኡብርሃም ዐንዶም ለብእቶም ሰብስልጠት ሕኩመት ወጀብህት እንዴ ሓድረወ ለትደሐረው እብ ፍዕል ወዝር ለነሰኡው ተድራብ ለሸርሕ ዕፌ ቀደመው።

ብርጋዴር ጀነራል ኡብርሃም ዐንዶም እቲ አስምዐየ ከሊመት፡ እለ እብ ዐውል ቃሊ ለትረከበት ወተሐፈዘት ደውለት እግል

ትትቀደም ወትጠውር እት ሸባብ ትገብእ ለህሌት ክሰኣት ረኣሰማል እንዴ ዘክረ፡ ክል ጂል ዲብ ወክዱ እብ መዐጸም እንዴ ከድመ ግራሁ ለህለ ጂል አውረሱት፡ ሕያን እንዴ ኢገብእ ዋጅብ መዋዝኒ ክም ቱ አፍህመ።

“እለ አምዕል እሌ፡ እብ ኩሉ ብቅዓም እንዴ ገብኦ ክም ከም መዋዝኒን መስኡልየት ለትረፍዖ እቲ አምዕል ፍንቲት ተ” ለበሊ ቃእድ መርከዝ ተድራብ ክድመት ወጠን ኮሎኔል ደበሳይ ግዴ ህይ፡ ሙሽተርከትለ ተድራብ፡ ደውለት አዋይን ኢሰላ ወኢሐርብ እንዴ ፈግረት፡ ዲብ መርሐለት ሰላም ወዐማር ዲብ ትትዐዴ እለ ለህሌት መርሐለት ልትደሐር ክም ህለው እንዴ ሸርሐ፡ ዲብ ልትየመዋ እቱ ሸቅል እብ መትሰባል ወፈዛዐት

ዕዉታም እግል ልግብኦ ሰኣየቱ ሸርሐ።

ለተድራብ ዐስከሪ፡ ምህር ሰያሰት፡ ኬወ ወወራታት ርያደት ከህላት ለጠውር ሄራር ውበዕድ ከምክም ከም ዐሊ ለሐበረ ኮሎኔል ደበሳይ፡ ለበራምጅ እግል ልትወወት ለክድመው መስኡሊን ወሚርሐት ሐመደ።

ለትደሐረው፡ ለአምዕል ለሸርሕ በራምጅ ፈን ወሰረት ሳወ ለተኣርኡ ከሪጠ እንዴ ቀደመው፡ እብ እሉ ነስኦው ተአሂል፡ ለእብ ዐውል ቃሊ አርወሐት ወደም ለትረከበት ደውለት እግል ለዐምሮ ወልሕፈዞ ዱልያም ክም ቶም እብ ከረው ቀሰም አከደው።

እት ደንገበ ዲብ ተድራብ ዝያድ በቃዐት ለርኣው ጀዋእዝ ተከበተው።

መድረሰት ፈንዩት ዊና መባኒ ሐዲስ ልትበኔ ህለ



እት ነቅፈ ለህሌት መድረሰት ፈንዩት ዊነ፡ ለዐሊ እግሉ መሻክል ብነኦ እብ ደረጀት-ደረጀት ሐል እት ገቢኦ እግሉ ወኣላት ዋወር እብ መትነፍዖት፡ አካዳምያይ ወናይ ምህነት ከደማት ተዓቤ ክም ህሌት ትሸርሐ።

ምዴር ናይለ መድረሰት አሰይድ ቃልኡብ ዘርኡ፡ እግል ኤሪነ እቲ ለህበዩ ሐብረ፡ እቲ መድረሰት እምበለ እብ ደረጀት-ደረጀት ለትበነ መባኒ፡ ቅርፊት-ክድመት፡ መስከብ ደረሰ ወመደርሲን፡ አፍሱል ድራሰት፡ መክተብ መደርሲን፡ እቲ ክምስልሁመ ሐማማት ውበዕድ ለክምከመ መባኒ

ጽርግዩ ዐዲ-ጓዕዳድ- አቁርደት

ሰኒ ትሰርገል ህሌት

እት ወርሕ ኖቬምበር 2019 ለአንበተት 1ይት መርሐለት ብናኦ እግል አቃሊም ምግብ ወጋሽ-በርከ ዱቅሪ ለተኣትራክብ እስትራቴጂያይት ጽርግዩ፡ ዐዲ-ጓዕዳድ- አቁርደት ሰኒ ትሰርገል ክምስል ህሌት፡ ፈጻልየት ናይለ መሸርዕ ራቅብ ለህለ መሀንድሰ ሳምሶም ተሰፋይ ምን ወዛረት ብነኦ እግል ኤሪነ ሸርሐ።

“ምን ሐበለ አስክ ጩዴታት ለህለ ብለቅ ወሐስያት ለበዝሕ እቱ 30 ኪሎ ምትር ሰጋደት ድቅብ እግል ትንቀሰ ገብኦ ለህለ ጅህድ፡ ለካድም ክምስል ልደቀብ ዋዲሁ ህለ” ሙሀንድሰ ሳምሶም፡ እት ቀበት 3 ወርሕ 8% ምን ዓም ናይለ ወራት ሰርጉል ክምስል ህለ ወደሐ።

እብ ዓመት እት ለዓል ወተሓት ክፋል ናይለ ጽርግዩ 186 ኽጡዋ ሐንቲ ከርሰ ካናላት እግል ልትሸቁ በርናምጅ ክምስል ህለ ወእትሊ ወክድ እለ ለትፈናተ ቅያስ ለቡ 24 ምኑ ክምስል ተ'መ አፍህመ። ህቱ እንዴ እትሉ፡ ለ134 ኪሎ

ምትር ለሪሙ ናይ ቅዋራን ጽርግዩ፡ እቲ ለትሰተት እሉ 2 ሰነት እግል ልትመም ለቡት ሰኢየት ሸርሐ።

ለመሸርዕ እቲ ድዋራት ካልቁ ለህለ ኡብካት ሸቁል እብ ከሰሰ ህይ፡ መሀንድሰ ሳምሶም ትሰፋይ፡ ሰነን ዐደታት ሓበሌ፡ ዴዳ፡ ቀራን-ኩዶ፡ ምግራሕ፡ ጩዴታት ውበዕድ ኡብካት ሸቅል ክሱት እሎም ክምስል ህለ፡ ምስል ሄራር ናይለ ካድም ህይ ዝያድ መቅደረት አዳም እግል ለኣቱ ክምቱ ሐበረ።

እለ ምን ዐዲ-ጓዕዳድ እንዴ ትበገሰ አቁርደት ለለኣቱ 134 ኪሎ ምትር ጽርግዩ፡ እግል ቀደም እለ እት ክድመት ለዐሊ አቅሊም ዐንሰበ ለክይድ ኽዋ እብ 20 ኪሎ ምትር እግል ለአንቀሰ ቱ።

እብ ናይ ቻይነ ሸርከት ‘ሰፊኮ’ እብ ዘመናይ አግቡይ ልትሸቁ ለህለ 10.2 ምትር ሰምዋ ለበ 2 ከዋ ለቡ እስትራቴጂያይት ጽርግዩ ዐድ-ገዕዳድ-አቁርደት፡ ወራታት ብናህ እት ዮም 11 ኖቬምበር 2019 ቱ ረሰሚ ለአንበተት።

ልትበኔ ክም ህለ ሐበረ።

ኣላት ዋወር እብ ዋይ-ፋይ ክድመት ለለህይብ ዲጂታል መክተበትመ እት ወክድ ቅሩብ እንዴ ትዳለ፡ ከደማቱ እግል ለአስተብዴ ክምቱ ለአሸረ መምህር ቃልኡቤ፡ እለ፡ ምስል መባኒ ሐዲስ እንዴ ትጀምዐ፡ ዲብ አትጠወርት ለትትሃዩብ ድራሰት ነቲጀት ዐባይ እግል ለህሌ እግሉ ለቡተ ደማነት ሸርሐ።

ደረሰ እቲ ለህበዉ ረኣይ፡ እግል ዐቦት ወተጠውር መድረሰቶም ገቢኦ ለህለ ጅህድ እት በቃዐት ከደማት ደሪሰ ወኣድረሰት አህምየት ውቅል ሰበት ቡ፡ ክም አፍራሐዮም ሸርሐው።

እት ሰነት 1985 እት ሕፋር ኡራዲ ኤራትርየ ለአስተብዴት መድረሰት ፈንዩት ዊነ፡ ዮም ዓመት 117 አንሳት ለልትረከበ ዲዐም፡ 341 ደረሰ ተአደርሰ ህሌት።

3^ኛ ክፋል

ርኢሰ ኢሰያስ አፍወርቂ እብ ክሱስ ሓድር ተየልል ዐድነ ወመንጠቀት፡ ምስል ዓማት አክባር ዐድ ምነ ወደየ መቃበለት፡ ሸኡን ቀበት-ዐድ ለሽሰስ ጽበጠ እት 3^ኛ ክፋ'ለ መቃበለት ልተላላ፡ ቅራኡት በኪተት፡

ሰአል፡ ሓይስ ርኢሱ እት ሰነት 2016 እበ ተአናበተ ለልአተግኔፅ ንዛም-ማህየት፡ ኩሎም እት ዲሸ ለህለው፡ በህለት 70 ምእታይት አንፋር ክድመት ወጠን ወሲሺል ሸቃለ ሕክመት ትነፈዐው ምኑ። ምናተ እትሊ እብ መራሕሉ እት ፍዕል ለልተርጀም ሰታት፡ ናይ ገዳይም ወምተሐት 12ይ ፈሰል ለደረጃቶም ሸቃለ ለአትሓያስ ማህየት አሰክ እለ ኢታመመ እሉም። ከእትለ ሰነት ጎነ እሊ ለከሰስ በርናምጅ ሕክመት ሚ ሀለ?

በሊሱ፡ እሰልፍ እግል አትፋቅዱ ለሐዘ፡ እሊታት ሐቲ ወክልኤ ሳዐት እንዴ ተሃጌከ ዲቡ ለተምም ጋር ኢኮን። ወክድ ብዙሕ ሰበት ነሰኢ፡ ሽዑብ ህይ እግል ለአምሩ ሰበት ለአትሐዘ፡ ለከሰስ- ሸቃላይ ሕክመት ለልትበህልመ ለቅድየት ሰኒ ጀላብ እግል ልፍሀመ፡ እት ብዕድ በራምጅ እብ ቁሪነ እግል ትትጸበጥ ለበ ቅድየት ተ። “ሸቃለ ሕክመት” ልትበህል እት ሀላ፡ ክምለ እት ብዕድ ድወል ለህለው ሸቃለ ሕክመት ኢኮን። ምን መደት ንዳል ሰለሕ እንዴ አንበተ ለትከእለለ ክፋል ናይለ መጅተመፅ አክረቱ በዐል-ማህየት ምን ሕክመት ሰበት ቲ፡ ናዩ ዓላብ ወጅንሰ እብ ዋጅብ እት ኮም- ኮሙ እንዴ ረተብከ እግል ትርአዩ ብከ። ሰበቡ፡ ኩለ ሐያቱ እት ንዳል ለከለሰዩ፡ ጼወ ለዓቡ ለትፈናተ መሰኡልያት ለረፍዐ አዳም ናይ ሕክመት ሸቃለ ሐቆመ ጉበአው አውመ ሕክመት ማህየት ትደፍዑ ሐቆ ጉበአት፡ “እብ ከአፎ እግል ልትናበር ቀድር?” እግል ቲበል ብከ። እሊ ህይ ዲብ ብዕድ አርእሰ ፋዬሕ ዋሌ። ሰበቡ ምን ቲ ለናይ

ሕክመት ሸቃላይ? ምን ምዶል ቲ ሸቃላይ ሕክመት ለጉበአ? ለቀዳም ወለ እት ምግብ ለሀለ ወለ ለሐዲስ ሸቃላይ ሕክመት፡ እብ ከአፎ እንዴ ሓበርከ ትርእዮም? ክም ምራድከ እግሉ እት ተርቲብ እንዴ አቴክ እግል ትሸቀዩ ብከ። እብሊ ህይ ሱረት ታ'መት ትነሰኢ። ለትሀርሱ ህሌከ አርእሰ ማህየት ሰበት ጉበአ፡ እሉም ሸቃለ ሕክመት ለእንብሎም ህይ እብ ናይ ሰሜት ማህየት ልትናበር ሰበት ጸንሐው፡ ወምን ሐቆ ሕርየት እንዴ አንበተት ለማህየት ምንመ ዐለት፡ እለ ማህየት እለ አክል-ሕድ ጠለባት መንበረት ናይ ክል ሸቃላይ ሕክመት ለትአተምም ተ እንዴ ትቤ እግል ትትሃጌ እበ ኢትቀድር። እብ ከሀላቲ፡ እብ እስትሸሃዱ ወእብ ለትፈናተ አግቡይ እግላ መናበረት እት ልትጋደለ ገይሰ ጸንሐ። ምናተ ዲመ እብላህ እግል ተአተላሌ ኢትቀድር። ሰበት እሊ፡ ምስል ተቅዩር ፅምለት ሐዳሱ እት ሰነት 2015፡ በህለት ለተቅዩር ፅምለት እት ገሌ መጃላት እቅትሳድ - እት ናይ ንዛም-ማል ምን ጉበእ ወእት ምቅርሔ ሰላዲነ ተቅዩር እግል ለአምጽእ ሰበት ቀድር፡ ለናይ ሸቃለ ማህየት ትትበህልመ ምስሉ እግል ትትረኤ ሀለ እለ ብሁል ዐለ። ለፍክረት ላኪን እት ሰነት 2015 ለመጽአት ኢኮን። ቀደሚሁ ክም አሰፍ ዐለት። እሊ ሸቃላይ ሕክመት እብ ከአፎ ፊአት እግል ልትናበር ቀድር? በዲር የምክን እብ በይኑ ልትናበር ዐለ፡ ሐሬ ላኪን ዐየሉ፡ ሐቆ ዐየለ መሰኡልየት ጼወ እብ ከአፎ እግል ልርፈዐ ወለአትናብረ ቀድር? “እንዴ ምስለ ተቅዩር ናይለ ፅምለት ለሐዲስ ለልአትሐዘነ ተቃዩም እንዴ ወዲነ እት ሰነት 2015 ነኣንብተ” እንቤ፡ ለሰልምለ ማህየት ላኪን ምስለ እት ቀበት ሽዑብ ለህሌት ሓለት መንበረት ምስለ ናይ ግድዳም ወሕጉዛም፡ ክምሰልሁመ እብ ለትፈናተ ተየልል ጠቢዐት መናበረት ለወጸዐቶም፡ ምነ ሸቃላይ ሕክመት እንዴ ፈንቴክ ለኢልትረአው ከፈፍል ናይለ መጅተመፅ፡ እት

መቃበለት ርኢሰ ኢሰያስ፡ ምስል ዓማት አክባር ቀበት-ዐድ

ናዮም ሓለት መንበረት ህይ እብ ከአፎ እግል ተአትሳኔ ትቀድር? ተሐሰበ። ላኪን፡መሐለኪት ብዙሕ ሰበት ሳደፊኑ ወለእቅትሳድናመ እንዴ ሀደኢነ እግል ንንደቁ ሰበት ኢደቀብኩ፡ ህቲ ለከልቀዩ ጨቅጥ ሀለ።

ብዕድ ለትፈናተ ጨቅጥመ ሰበት ሀላ፡ ለቅድየት ሐል እግል ትርኩብ ሐቆመ ጉበአት፡ ክም ላብድ ሸቅል-ቤትነ እንዴ ዐለብኩ፡ ሕፍዝነ እንዴ ወዲነ እግል ንቀርረ ወጅብኩ። ለተቅዩር ፅምለት ላኪን፡ ክም መርሐለት እንዴ ሐሰብናሁ እግል ንሸቄ እቡ እንዴ ትበሀላ፡ ክልኣት ሐል ለጉበእ ለፍክረት ዓረግናህ ወከሬናህ... አክረቱ ህይ ለአርእሰ አሰክ ብዕድ ሸክፍ ጉበአ። ማህየት ሸቃለ ሕክመት ሌጠ ኢኮን። ለእቅትሳድ ህይ? ሓለት እቅትሳድነ እት ሚ ደረጀት ህሌት? እንዴ እግላመ ንርአዩ፤ ሰበቡ ህይ፡ ሐል-ዳይም እግል ነኣምጽእ ሀለ እግልነ፤ እንዴ ትፈሀሚነ ወመሻክልነ አክል-ሕድ እንዴ ደሊናሁ፡ መሓግዝነ እግል ንግሌሕ ነሐዜ ህሌነ፤ ላኪን እብ ሽዑር እግል ንግልሐ ይእንቀድር። እንዴ እንክልል ዐልነ ላኪን ሓድረት ሓለት እቅትሳድነ ሰበት ተሐድደኩ፡ ለእቅትሳድ ሚ መስል? እተየ ዐለ ወአሰክ አየ ልሄርር ሀለ? ማህየት እግል ትሰኔ ሐቆመ ጉበአት፡ መናበረት ናይ ኩሎም ከፈፍል ናይለ በዐል ማህየት ለልትበህል መጅተመፅ፡ እብ ሳብተት (sustainable) ገበይ እግል ትሰኔ በ።

ሰበት እሊ፡ ግረ እንዴ አቅመትነ ሓለት እቅትሳድነ እግል ንጌምመ ወጅብኩ። እብ እስዉ ምክያል ህይ ንርአዩ? እሰልፍ አፍረዮት አውመ አክእላል ርዝቅ (wealth creation) ቲ። እት ለጉበእ መጅተመፅ እቅትሳድ እንዴ ትቤ እግል ትትሃጌ ሐቆመ ጉበአኩ፡ ለቅድየት ከሊቅ ርዝቅ እቲ ትመጽእ። ርቅዝ እብ ከአፎ ትከልቁ? እተይ ናይ ደውለት ሚ ቲ - ወአክል አዩ ቲ? መጃል እብ መጃል፡ መሰነፅ እብ መሰነፅ ለእተይ ደውለት ሚ መስል? ዓሱ ሐርሱ ተፅዲን፡ ለትፈናተ እት እተይ ደውለት ሐዞት ለቡ መጃላት ወመሳኔፅ እስኪ እብ ሐትሐቲ ልትቀዩም፤ ምን ሐቆ ሕርየት እንዴ አንበተ ልትጀመፅ ለዐለ ሐብሬታት ሚሙይ ኢኮን። ምናተ ሱረት ፅሙማይት እግል ለሀብ ቀድር። እግላ እተይ ናይለ ደውለት ለወዝን ሐብሬታት ሀለ። እሊ አሰክ አየ እግል ልዕቤ ቀድር? አክረቱ ዮም ማህየት ተሐሰብ ሐቆ ህሊኩ ናይ ክል ሸቃላይ ሕክመት ሌጠ እንዴ ኢትጉበእ፡ ጀሚፅ ናይ ኩሎም ሸቃለ ሕክመት ምስለ ቴለል ዐቦት እቅትሳድ ከአፎ እግል ልግበእ ቀድር? እቅትሳድ እግል ልዕቤ ሐቆመ ሐዜንሁ፡ መሐለኪቱ ሚ ቲ? ወሚ አብዮት ህይ ሀለ



እሉ? አሰክ አየ ገጹ ህይ እግል ልዕቤ ቀድር? እሊ እግል ኖሱ መጃል ዐቢቲ። በሊሰ ቀሊልመ እግል ትርኩብ እሉ ኢትቀድር -ዓላብ እግል ለሀሌ እግልከ በ። እብ ሽዑር ወሀውኪ “ማህየት ክእነ እግል ትግበእ ወጅብ” እግል ቲበል ኢትቀድር። ሐቆህ እሊ አርእሰ እሊ አሰክ አየ ዋሌነ - ለእቅትሳድ አፍረዮት ሌጠ እንዴ ኢጉበእ፡ አትመቃርሐት ርዝቅ (wealth sharing) አውመ (wealth distribution)ቲ። እቅትሳድ በሀለት አፍረዮት፡ ካፈሎት ወእስትህላክ ሐቆመ ጉበአ፡ ለአሳሱ ለአፍረዮት ቲ። አፍረዮት፡ ብንዩት እቅትሳድ፡ ሸቅየት ርዝቅ ቲ። ካፈሎት ናይለ ርዝቅ ህይ? ካፈሎት ርዝቅመ ናዩ ፅላቀት ምግት ሰበት በ፡ ምስል አፍረዮት ወአክር ህይ ምስል እስትህላክ ፅላቀት ሰበት በ፡ እብ ከአፎ ልትመቃረሕ ሀለ? ሸቃለ ሕክመት ሌጠ እንዴ ኢጉበእ፡ እት ርዕዮ ለልትከሰእ ከፈፍል መጅተመፅ ህይ መናበረቱ ሚ ትመስል? ሰብ ሐርሰ ህይ መንበረቶም ሚ ትመስል? እት ትጃረት፡ ክሰኣት ማል ወብዕድ ለትፈናተ ወራታት ለከድም እብ ከአፎ ልትናበር ሀለ? ርዝቅለ ደውለት እብ ከአፎ ልትመቃረሕ ሀለ? እብ ዐዳለት ለበ ገበይ ልትመቃረሕ ሀለ ማሚ? መሰከብት ለከልቅ፡ እብ ሐዲስ እግላ እቅትሳድ ደቅብ ለልሀይብ አትመቃርሐት እግል ለሀሌ እሉ ወጅቡ። ለአትመቃርሐትክ ሚ መስል? ሽዑብ ህይ እት ከአፎ ለትመስል መናበረት ነብር ሀለ? ተርቲብ ጂኦግራፍየት ልግበእ ወእብ ደረጀት መንበረት ዶል ትርእዩ፡ እተዩ ነብር ሀለ? እት መዲነት እትለ ነብር፡ እት ሽብህ መዲነት ወዲብ ብሩር እሊ ነህድጉ ለሀሌነ ርዝቅለ ደውለት እብ ከአፎ ልትመቃረሕ እቲ ሀለ?

እሊመ እብ ወለት-ገበይ እግላ

ማህየት ወመንበረት ናይለ ሸቃላይ ሕክመት ተምትሙ። መብዝሐ መጅተመፅ እብ ዓይለት-ረሓብ (extended family) ለቁማ ቲ። ናይ ሐቲ ዓይለት ሌጠ ኢኮን- እት ኖሱ-ኖሱ ተእሰር ለቡ ቲ። እሊመ እብ ፅምቅ እግል ልትሐፈዝ በ። ሰበቡ፡ “ክእነ እግል ልግበእ ቡ” እንዴ እንቤ እንቀርር እት ህሌኩ ለማህየት እግል ሰነት አውመ እግል ክልኤ ሰነት ሌጠ እንዴ ኢትጉበእ፡ እግል ወክድ ረዩም ለተንክር ወደማን ለበ ክም ትጉበእ እግል ነኣድምን ሰበት ወጅብኩ፡ ለማህየት እት ሸቃለ ሕክመት ለትሐድጉ አሰር-ሰኒ ሌጠ እንዴ ኢጉበእ፡ እቅትሳድ ደውለትመ ሰበት ትሸምሉ፡ ሓለቶም እብሊ እግል ትትጸበጥ በ። እብ ዓመት እግል እሊታት ለትከሰስ ሐብሬ ተሐየበት፡ ሕፍዝናመ እብ ተማሙ አሰፊናሁ ምን ጉበእ፡ “ክእነ እግል ልግበእ ወጅቡ” እንዴ እንቤ እብ ደማን እግል ንትሃጌ እንቀድር። እቅትሳድነ ሓለቱ ወዐቦቲ ለጉበእ ሸክል እግል ለሀሌ እሉ ሰበት ቀድር፡ ማህየት ህይ “ክእነ እግል ትግበእ በ” እንዴ እንቤ አዜ እግል ነሐድድ ላኪን አርእሰ ክቡድ ቲ። “እግሉ እንዴ ከፋኩፍነ ሕፍዝ እንወዴ ወዲብ ክላሳት ሐቲ እንዴ በጸሐነ እግል ንቀርር ቲ ቀደም ብሂልኩ፡ መግባሰ ለጉበእ እግልኩ፡ ለሕፍዝ እት እንወድዩ፡ መጥመጦሩም ንዛምለ ማህየት እግል ልግበእ ቡ” ትበሀላ። “እብላ ትደሀረ ነኣንብት” እንቤ፡ እበ ለትደሀረ ነኣንብት ሐቆመ ህሌኩ ክም ኒበሉ? ብዙሕ ቲ ለትሐሰበ ዲቡ። ሰበቡ፡ ለትደሀረ ዶል ትብል፡ አሮ አደሚ ሚ ለአትሐዝዩ? እብ ሐዱ ነብረ ወአጅናሱ፡ ማይ-ጭሩይ፡ ልባሱ፡ እሰኢን፡ ቤት (ናይ ኖሱ አው እብ ክራይ ወመጸጌፅ) እግል ልርኩብ በ።

ዲብ ገጽ 5 ልተላሌ

እፈትርየፀጃላክ

ክል አርቡፅ ለትጠ'በፅ ጀሪደት

መዳልየት፡

- መሐመድ እድሪስ
- ክልሹም መሐመድ
- አድም ሳልሕ
- ሳልሕ እድሪስ

ለይአውት ወአርተዖት

- * ዘሀረ ዐሊ
- * ፋጥነ አድም

ተለፎን። 121797/07121322

ፋክስ። 127749። ዕ.ሰ.ቡ። 247

ተውገዕ ጀሪደት።

ተለፎን። 200454

ኢትአመሮት።

ተለፎን። 125013። ዕ.ሰ.ቡ። 1284

2^ይ ክፈል

ሰፈር ለሰፈር ተሐበረዩ

ህዳይ ዐድ መ/ዑመር ሳምን ሐቆለ አዶረ ወረብዐቱ እንዴ ኢትትፋገር፤ እት ደሚር ክልኦት ለመርዐውዮታት ለይዐለ ሐዲስ ቴለል ህቱ ሰደፈ። እሊ ሐዲስ ቴለል ህይ እግል መ/ዑመር ወድ ሕመድ እስክ ሳወ እግል ልትበገስ ወረቀት ትብጊሰት በክት ወፊነ ለኢትህይብ መጽሐቱ። ለወረቀት ፈጅኦት ሰበት ዐለት ህይ። ህቶም ሌጠ እንዴ ኢጉብኦ ክሉ ደንገጽ። ላኪን ለኢተርፍ ዋጅብ ወጠን ሰበት ጉብኦ። መ/ዑመር እንዴ ትከማከመ እስክ ሳወ እት ሳልሳይት ደውረት ክድመት ወጠን ትበገሰ። አይወ እብ መአማን መ ሸይ ክቡድቱ ለዐለ። እብ ፍንቱይ እት ደሚርም ይዐለ ወእት ክያሎም መ ክንዶእ እንዴኢትን ሰውር ለኢልአምር ጋር ህቱ ሳደፈ። ለሳደፈት መፋጀኦት ሰበት ዐለት መ/ዑመር ረአሱ ሐር እንዴ ኢልትወለብ ወእግለ ምን ኬን ክርፍ ለዐለት መርዓት እንዴ ኢልትፋኑዩ በርጋይ እብ ተብጊሰት ጉብኦ።

አምነ አብር መ ለቅንጽቱ ፈጅኦትን እንዴ ኢትረድዩ ሰፈላል እት ከብደ እት እንተ፡ “ያረቢ ናይ ዲመ ፍንቱት ኢትደዩ” ትቤ ወእት ረቢህ እተደዓት። እብ ሰላሙ እግል ለአቅብል እት ትድዴ ህይ እተ ክርፍ ምስል መሳሂተ እት ትትሃጀክ ወተኦትረሰዐ ዐለት። መ/ዑመር ላቱ እግል ሐቱ ዶልመ ነፍሱ እግል ለኦትረሰዐ ምንመ ሐዘ። ለእት ምን ኬን ክርፍ ሓድገ ለዐለ መርዓት ዶልተ ከእት ገዱ ትበጠረት። ክልኤ ዕንቱመ ረአሰን ቀደም ግንሐት አብዩ እግሉ ግራሁ ዋርድዩት ጉብኦዩ። ያረቢ ክርዐ እለ ሓለት እለ እት ልብል ህይ እግል አርወሐቱ አትሃደኦ። ለሱድፍቱ ለዐለት ክድመት ወጠን ዋጅብ ክም ምዋጥን ሰበት ጉብኦት እግሉ ትከብተ። መ/ዑመር ሰለ ወሬሕ ናይ ተዕሊም እንዴ አትመመ። እብ አሲራር እብ እገር ምን ሳወ እስክ ግንራራብ በሐር ቀያሕ። ማርሰ ግልቡብ ወተክላይ በጽሐ። አሲራር እብ እገር ክምስል አትመመው። ገሌ ሱብ በክት ጀፈር ዐዶም በጽሐዮም። ወመ/ዑመር ወአከይ በክቱ አዜመ እት ባቡር በሐር እንዴ ጸዕነ ከከሰክ ዐሰብ ሳፈረ።

አዜመ ሰፈላል ሰርቤብ አኖካይ መ/ዑመር ኢወሐደ። አክለ ለጀልበት ሞጅ ዎሮት ህቱ ሃጸፈዮተ ክምስል ንፋዝ ምን ሞጅ ሀማት ወሸቀላት በል ለኦብል ዐለ። እበ እት ሳወ ደርሱ ለዐለ ተክቲክ ዐስከሪ ወሰያሲ። በደል ሻም እሲት ሻም ወጠን ክምስል ለሐይል ወልትተረድ ይቁን እት እንቱ ሰፈሩ አተላለ እስክ ዐሰብ።

አይወ ለሓለት ክልኦት ለተኦትፈክርተ። ለምልሽተ እንዴ ኢትቀልዕ ወእት ሰላመት እንዴ ኢትትብህሎ ህተ ምን ኬን ክርፍ እት ቀሚጭ ክምስል ዐይር ውሕዝ

ሃዱዱ እንዴ ኢትሰመዕ ወደበኖሁ እንዴ ኢትርኤ። ሰፈር አዛበጠ እቶም። ፍንቱት በል ሸም ሰፈላል ደቀበት ወጽብሬህ መረ።


አምነ አብር እት ሸፍር አብዕበ ሕመድ ወድ ኢብራሂም ኢጸንሐዩ ወአቦተ ፋዋኑ ሐም ኢትን ወሐማት ከልሕ ብልሕ ትቤ። ወሐማህ ዋጅብ ወጠን ተረደ እቱ ከእስክ ዐሰብ ሳፈረ። ረቢ ለኢትሐልፍ ኢመነ መ/ዑመር ሐቆ ሰርቤብ ወአኖካይ ምስል ረዩም ምድር ወለ ሃባት ለመስል ካቤት ወሰሞም ባዶብ ደንካልዩ ዶልተ ከሐቱ እትብሉ ነፍሱ ወዶል እት ገዱ እት ልትብጠር ዐዱ ወለ ሱብኡ ወለ ብሩድ ሸማል ምድሩ። እግል ናይ ሐቱ ሰነት ክድመት ወጠን እንዴ አትመመ ፈርሐቱ እት ቀርብ ወሀመቱ እት ቀልል እብ ሰአዩት እቅባለት ልጸበር ዐለ። ላመ ምስል ዐድ ሐሁ ሓድገ ዐለ መርዓቱ። አቡህ እንዴ መጽኢ፡ “ግድም መ/ዑመር ወለ የሀለ ምስለ ወለት። ወለቹ ምስልዬ እግል ኢደያቱ” ቤለ ወአምነ አብር እስክ ዐደ ገዐዘት።

መ / ዑ መ ር ወድ (ዜዳን) ሐቆ መትዐዳዩ እስክ ዐሰብ። በዲር እት ሳወ ለ ት አ መ ረ ም ሰ ሉ ም ሸባብ ወሰነኑ አደሐ እንዴ ትጀመዐው ዎሮት ተ ከእበ ሐልፈ ሐ ያ ቱ ውሓለት ዐዱ ደግሞ ምን መ ዐለው። እብ ፍንቱይ ክልዶል ሸባብ ግርመት መጅተመያም እብ ረቢ ግርመት ለካፈለዩን አዋልድ አንሳት ሰበት ሸርሕወን፡ “ኣነ እሲቼ ክእኒ ትመስል። ሕጹቼ ግርመተ እት አዋልድ ኢትትዐደል” ለልብል ዘዖታት ልትደጋግም ልውዕል ምንመ ዐለ። መ/ዑመር ላኪን ሰሚተ ልግበእ ወሰረተ እፍጉር ኢልአምር። እሊ ህይ እብ ጠቢዐት ለእተ ዐበ ወለ እለ ወርሰ ቀምየት ብዳዌት ተ። ድሩርያት መ ትረከበ ምን ጉብእ ወለት አብር ሌጠ ልብለከ እንዴኢትን አምነ አብር እግል ልበል ላቱ ሸይ ክቡድ ልትረአዩ ዐለ። ምን ወለት አብር ወኬን ጀበርካሁ ምን ጉብኦ። ክምስል ገመል እት ሰበር ዕጹይ እት ገነሐከ ወእት ሰመዐክ ክልሕ ብልሕ ሌጠ ልብለከ።

ሐቆ ሐል እት ዐሰብ ወእብ ሪሙ ወሰፈላሉ። ሰነት ግራህ ሀበት። ወላመ እቱ ዐለው ክፈል ዳሸ እግል ሰርሓሆም መዳለቱ አትመመ። ሐልመ አምዕል አምዕል እት ደርክ ወእትጌልል ለተርፈት ዐለት

ተሐልፍ። ወለሓልፈት ለዐለት መ ተርፍ። አይወ ምነ እቱ ዐለው ዳሸ ወድ ዜዳን ወጀመዓቱ እግል ሰፈር እስክ ዐዶታቶም እት ዐሰብ ትጀመዐው። እሊ ወቅት እሊ መ/ዑመር እብ ደሚሩ ወክያሉ ሐር እንዴ አቅበለ። ምስለ እምበል ምራዱ ግራሁ እንዴ ሀበዩ ምን ኬን ክርፍ እት ቀምጭ ሓድገ ለዐለ እምነ አብር እተ እንዴ አወልወለ። ጸነ አድሕድ እግል ልንሳኢ። ወፍንቲት ቀሰብ ለአምጽኦተ ሰርቤብ ወሰፈላል እቡ ለሓኪ እግለ ዐለ። አምዕል ተብጊሰቶም ወቅት ክምስል ተመ ምጽቶም እብ በቡር በሐር እት ጉብእ እቅባለቶም ህይ እብ መካይን ዐለ።

እብ ሰለሙ ለምኑ ትፈረረ ሸፍር እቱ ዔረ። ወለዘት ምርዒነ ምስል ሐ ማ ሁ



ክል ዎሮት ከእተ ሐንቲለ ጽላል ወግሬተት ለአትቀምቶም ዐለ። አምዕል ወለዳመ ሮዮም ክምስል ኢርአው። በዐል ቃብል ክምስል ትፈረጀት ትዩቀነ። ሓለት ዐድ መ/ዑመር ክል ዶል ለትኦትፈክር ሓለት ተ። በዲር እሲቱ እት ክርፍ እት እንተ ተፍሪረት ኣስክ ሳወ ሳደፈዩ። አዜመ እሲቱ እት ቤት ሕርስ እት እንተ ተፍሪረት እግል ዐማር ሳደፈዩ። ወእብሊ አምዕል ሰመያተ ወልዱ ሰር አምዕል እስክ ነቅፈ ትወረበ። ምስል መልህያሙ እግል ገሌ አዋርሕ እት ባካት ዓለ ሐቆለ ጸንሐ። ሸማል ዐማር ብዕድ ሸማል ሰበት ተሓበረዩ አዜመ እብ ጅላብቱ እስክ ዐሰብ አምዋጅ በሐር ሳዋረ።

እሊ ፈራሮ እሊ ዕለት 28-04-1998ቱ ለዐለ። እሊ ፈራሮ እሊ እግል ወድ ዜዳን ከበር አከይ መስእል ልትረአዩ ዐለ። አዜመ መ/ዑመር ጋኑ ምን ግራሁ እንዴ ኢሰክብ ክምስል አዳሙ እግሩ እትልሰሕብ ገበይ ዐሰብ እብ ሪመ ወሰድተ ነተረ። ለእግሉ እግል ልርኤ ልተምኔ ለዐለ ወድ ብክሩ ማሕሙድ መ/ዑመር እንዴ ኢልርእዩ ገበይ ሀመት። ሸቀላት ወሪም ምድር እንዴ ኢፈቱ ነተረዩ። ላመ እግል ዐውቴህ ትፈረረ በርናምጅ ዐማር እት ቀደሚሁ ከይነት ወዋይዲባት ዓቅር ክምስል ዐለ ኢደለ። መ/ዑመር ክምስል አዳሙ ንዋት ዐማር እንዴ ከረዩ ከንዋት መዳፈዐት ረፍዐ። ክሎም ለጅኑድ አደሐ እት ጽላል ልውዕሉ ወላሊ እብ ግዲደ እት ሐፍር ድፈዓት ልሰህር ዐለው።

ረቢ ልግበእ እተ ለሓለት እሊ። አደሐ ጽጋብ ወላሊ ሰካብ በደል ዐለት። አዜ እንዴ ትቀየረት አደሐ ሰካብ ወላሊ ሐፊር ድፋዓት ትበደለት። ክልዶል

ህይ ሀመት ወሸቀላት ምን ገጽ ላሊ ምንመ በዘሕ። መ/ዑመር ወጅማዐቱ ላኪን ሓለት ድፋዕ ሰበት ቀየረቶም ላሊ እብለ ሚሰተ ሀመተ ኢደሉ ወሸቀላተ። ምን ገጽ አደሐ ላኪን ክሉ ዐስከር ምክራሩ እት በጽሕ መ/ዑመር ላኪን ዶልተ ከሕሳል ዎሮት ጽብዋ ወጠልቅ ልውዕል ዐለ። እክለ ሃባት ወካቤት ሀርርማይ ጸሓይ ደንካልዩ ሀጽፈዮተ እብ ልቡ ወክያሉ እተ ሐነ ወግሬተት ሊጋምለት እተ ለአጸልል ወምስል እም መሕሙድ ወልዱ ለአመሕብር ዐለ። እብ ክእኒ ለመስል ሓለት ህይ ለእግል ዎሮት ወሬሕ ለትብህለት ተፍሪረት አርበዕ ሐል አዶረት።

ለእበ ልትሻቀል ለዐለ እሲቱ ወዓፍየተ ሐቆ ተፍሪረቱ ረቢ ዓፍየት ከረ እተ ወምስል ወልደ እት ተሀምግ ወሐነ ጽላለ ገምለት ወግሬተቶም እት ለአጸሎ። ሸቀላቶም እብ መ/

ዑመር ዐለት እንዴኢትን ህቶም ላቱ በኪታም ዐለው። መሕሙዳይ አቡሁ ዕንቃቅ እት እንቱ ምንመ ለሐድጉ። ምን መትባላስ እት ሸሐግ ወምን ሸሐግ መ እት ታካብ በጽሐ። ሐቆ ሸሐግ ህይ ደብ ደብ ደብ ለትብል ዘዐት ምን አፋሁ ከሪህ አቤ። አክለ ክእኒ ቤለ ህይ አቡክ እምዕል ኬሩ መጽእ ሕልብዬ ትብሉ ዐለት አምነ።

መሕሙድ ታካቦት ሐቆ እንበተ ላቱ ላመ ገበይ እግል ተወላለብ ዐድ ዘይዳን እብ ምግብ ሰበት ተሐልፍ። አክለ ዶልተ ዎሮት እት ለሐልፍ ረኣተ፡ “ይመ ሎሂ አቡዬት?” ለልብል ሰኣል እት እሙ ለአተርቱ ዐለ። ሕልብዬ አቡክ አምዕል መጽኦተ በኪት ልርእዩ እት ትብል አምነ እብ ደሚር ህይ እት ሸቀላት ወሀማት ትትከሬ ዐለት። ሰፈላል ወልደ ህይ ህታመ ሰፋለለዩ።

አምነ እብ ጠቢዐተ ሃድኦት ወበዓል ሱብር ወመሓሸማይት ሐማሀተ። ህግያህ ሕድት እግል ሕላሌ እዴህ ለኢትህይብ ክልዶል ሰአዩት ለኢትብትክ ሰበት ጉብኦት። እንዴ ኢትጽብር ገበይ ሐማህ እብ ሰአዩት ተኦትቅብል ዐለት። ሕሳል ደሐን ለትዋሌ ወእት ሐህ ወግዋሬህ ለኢትዓሬ ፈታይት ክሉ እያያ ተ ለዐለት። ክሉመ እተ ከምስልህቱ ለዐለ። ወድ ዜዳን እተ እት ረአሰ ሸዐብ ኤረትርዩ ለአተላለ ሰልኦስ ወራር ምስለ ምስሉ ለዐለው ፍራስ ቅዋት ድፋዕ ኤረትርዩ እብ ቢታክት ተሐረበ። ክል ሓለቱ ህይ ወጠንዩት ተእሲር እንዴ ወዴት እቱ ለበዝሐ እበ እቱ ዐለው ቴለል ድፈዕ ሌጠ ዐለ ሀሙ ወቀልቡ። እሊ ክሉ ላሊሁ ወአምዕሉ እብ ወለት አብር ወወልደ ለዐለ ሕሳብ። ወእብ ወጠንዩት ወወራር ቱ ለዐለ አፍካሩ።

ምስል ወቅት ህይ ወድ ዜዳን እተ ወጠንያይ ቴለል እት ልተረድ መጽእ ሰበት ዐለ። ምን ጅንዲ ዓዲ እት ደረጀት መስኡልየት እት ልትወቀል ምጽእ ዐለ። ምን ጅንዲ ክልየት መጅሙዐት እስክ መስኡል ፈሲለት በጽሐ። ወእተ ሳልስ ወራር እብለን ለእግለን ዘክርት ደረጃት ትመረሐ ወመርሐ። እት ሳልሳይ ወራር ህይ ክቡድ ጅራሕ ሳደፈዩ ወእት ዕያዳት ወቅት ረዩም ነሰኦ። ሐቆ አቅበለቱ ህይ ለእቱ ዐለ ክፈል ዳሸ እት ሐዲስ ሕርያን አትያም ጸንሐው። ወህቱመ ምስሎም እግለ ምን ተሐት ፈሲለት ለህለው መስኡሊን እግል ልሕሬ አንበተ። እሊ ተቆዩም እሊ ህይ አካናት ለአስተሸሀደው እግል ልደበእ ጉብእ ዐለ።

መ/ዑመር አክለ ለምስሉ እት እንቶም ለአስተሸሀደው ፈቅዳተ አርድ ምን ምፍራቅ ሾመት ጩብብ እቱ ዐለ። እብ ናዮም ዝክርያት ህይ ለአረይም ወለአቀርብ። ዶል ልትሰሐቅ ወዶልመ ለሐርቅ። እበ ወድያሙ ለዐለው ፍርሰነት ህይ ክልዶል ልትሐበን ወልትፋወሸ ዐለ።

ትተላሌ....



ንዳል ወኪመትሐላል የም እግል ዐቦት ወማሌ ጀለ እስትቅላል



መናድላት ሊባኖስ ወልዴሚካኤል

ምን ከደን ለልርእየ ሾከት ለረግዘታመ ኢትመስል። ልባሰ ሳትሩ ለሀለ መፋርቅ ላኪን ፅላመት ናይለ ምን ርሳሰ ወጅሌል ሐጻይን እቡሩይ ለኢለአምር ሚዳን ኤራትርየ ወእሉ እንዴ ጸረ ለሄረረ ሙናድልቱ። ሊባኖስ ወልዴሚካኤል እት 1977 ምን ከረን ናደለት። ፍግረተ ምን ከረን ከፎ ክም ዐለት ዲብ ትደግም። ለዶል ከረን ሕርርት ዐለት። ሰጅሉኒ እግል እናድል ክም ቴሎም ሰኒ ንኢሸ ሰበት ዐለት ኣዜዲ ዕበይ እንዴ ቤለው መትከባተ አበው። ህቶም ክም አቅበጸው ሀዩ። ገለብ እንዴ ፈግረት ክተቡኒ ምን ትቤ ኢገብኦ እለ። እት ደንጎበ ዛግር ጌሰት ወትምኔት ልበ እንዴ ተመት እለ ትከብተው። ክምለ ቀልበ ፈትየ ዐለ ሙናድላት ገብአት። ወእት ቅ ዋት ድፈዕ ትወዘዐት። “ዲብ ቅዋት ምን ንትወዘዐመ እግለ ነኣይሸ ፍንቲት መራዐየት ወዱ እነ ዐለው። አፋሆም እንዴ ሐድገው ለሐሰት ልቡለ ነብረ እግልነ ለሀዩቤ ምን አባይ ለልትረከብ ልባሰ ልግበእ ወሳቡን እግልነ አውለውየት ወዘያደት ለሀይቡ። ክምለ እት ነኣይሸ ውላዶም ከባክቡነ ወለሐቅፋነ ዐለው” እት ትብል። ለትከብተም ሙናድሊን ኣክል አዩ ርሒማም ወሰብ ኤማን ክም ዐለው ትፈቅድ።

ንኢሸመ ምን ትገብእ ነፍሰ ሰኔት

ሰበት ዐለት። እት ምህሮመ ሳምናይ ፈሰል እትምምት ሰበት ዐለት መድረሰት ሰውረት ይኣቱት። እት ቅዋት ድፈዕ ትወዘዐት። ወለት 13 ከፎ አሰክ ኢናደልኮ ትብል? እት ልብል ሰኣል ዲብ ትብልሰ ሊባኖስ። አነ ኢኮን ጅነ ግርዝመ ጽዋር ወረፍዐ እበ አባይ ወዴናተ ዐለ። ከረን እምበል ቤትነ ምን አንደደው እትነ ወዐድነ ክም አፍገረውነ አቱናህ። ለእኪት ሚዶል ምን ልብ ትብዴ ለልብል በሊሰ ሀበት እቱ።

ሊባኖስ ሐቆ ተድራብ ዐስከሪ ዲብ ብርጌድ 44 ትወዘዐት። ለወክድ ለሀይ ባጼዕ እግል ትጸበዋ የም አው ፈጅር ልትብሀል ለዐለ እቱ ወክድቱ። ለናይ ሰልፍ ድፈዕ ለጸብጠት እቱ ሀዩ ባጼዕቱ። ምኑ ፈሮ ወሐቆሁ ቀዳማይ ወራር ክም ቀንጸ አሰክ ግርሁ ሰርናይ(ምድር ትግራይ) እንዴ ተሓረበው ሐጽ



እትሓድ-ሶፔት እብ ክሉ ደቅበ መጦር ደርግ ሰበት በዋረት። ሚዳን ሐሊት አሰክ ትደለለት።ጀብህት

ሊባኖስ። ሕሩር አራዲ ግራሀ እንዴ ሐድገት እት ሳሕል ድፍዓተ እንዴ አተረደት እት ክፈሕ ትሩድ

1980 እግር ገለብ። እት 1984 ካልእ እግረ። ሳልሰ ምዝባዋ ምን ጀብህት ቅ/ምፍ/ጸሓይ በረ ጀሬት እቱ። እት ደብር ብሎሕ እት ገጸ ወእዴህ። ራብዐይት እት ሳምናይ ወራር(ፊራሮ በሐር-ነጋሽ) እብ ሐዲስ እት ጀ/ቅ/ምፍ/ጸ ሳሕል እት እግረ ትዘበጠት።



አባይ እብርድ ምንመ አበለው። አዜመ ካልእ ወራር ቀንጸ ወምን ግርሁ ሰርናይ ባጼዕ እንዴ አቅበለው ድፍዶም ጸብጠው።

ሽዕብየት(ሰውረት ኤራትርየ) ሀዩ ምን እሉ ሕርርት ዐለት አራዲ አንሰሐበት። እንሰሐብ ናይ ሰምሀር ሀዩ ለኣክ ዐለ መስል እት እግል

ትጸመደት። አባይ ሀዩ ሽዕብየት በዴት እንዴ ቤለ ሽዕብ እግል ለኣብህጅ ወሰእየት እግል ለኣብትክ ደዓዶቱ ምን አደቀበ እብ ሐዲስ ብርጌድ 44 ሐርብ ፅላባት እግል ቲዴ ከበሰ ፈግረት። እት ለትፈናተ አካናት ሀግት እት ወዴ ወመካይን እት ተኣነድድ እግል አባይ ሰካብ ከልኣቱ። ሓምሳይ ወራር ክም ተኣንበተ ሀዩ እብ ሐዲስ እት ሳሕል አቅበለት። ለዋሕደቶም እብ ርዳእ ሰበት ትከሬት። እት ከረ ሕዳቅ ድፈዕ ምንመ የዐለ እሉ። ለሙናድል ጽምኡ ወሰፍራሁ እንዴ ከሀለ ምስለ ጸንሐቱ ሓሊት ለገይሰ አግቦይ እንዴ ልትነፈዕ ሓምሳይ ወራርም ክምለ ቀዳምያም ቅርረት እት በልቀት ዋድቀት ገኣ ከተርፈ።

ሐቆ ፈሸል ሓምሳይ ወራር ለብርጌድ እት ጀብህት ቅብለት ምፍጋር ጸሓይ ሳሕል ሸፈት። ሊባኖስ እትሊ ሄራር ንዳል ዝያድ አርበዕ ዶል ጅርሕት ሀሌት። አወላይት ምዝባጠ እት

ዐውል ሕርየት እግል ልትአመር ወዶልክ እግል ልትፈቀድ ሰኔቱ። ሸባብ ብዙሕ ጀረበት ዲብ። ጽምእ ወሰፍራ። ተጎ ወዕርቅነ። ትርሃን ወተዕበት ዐለ እቱ ንዳል። ለሙናድል ሳኪን እለ ገኣኮ ወተከልኮ ኢቤለ አሰክለ መባጸሐ ኣብጸሐየ። አሰእን እንዴ ኢረክበ እብ ክል አካነ እንዴ ራቀዐየ እት ደንጎበ አካን እበ ትረቀዕ እንዴ ኢትረከበት እብ ሓፊሁ ገይሰ ለዐለ ሙናድል። እግልሚ ጀረብኮ እንዴ ቤለ አመት ነፍሱ እግል ሊዴ ኢሐሰበ ወኢትሰፍተተ!

መራረት እንሰሐብ ብዙሕ ትሸዕለል ምን። “ሕነ እምበል ከላሺንን ሐበት የዐለ እነ። አባይ ሳኪን ደባባቱ ወፈዋሊሉ ምድር ወዐስተር ዲብ ሕድ ሓበረዩ። ድፈዕ የዐለ እነ ጨበል ሕንፍል እንዴ አበልናቱ ለንትሓረብ። ምስሉም ማይ አለብነ ወነብረ ወአርድ እሳት። ምስል እሊ ክሉ ለሙናድል ሰእየት ኢበትክ ወኩብዱ ኢትዘረገት። ሐቱ ለሰዴተነ ለምድር ሽምሽመት ወጨብለት ትክምት ሰበት ዐለት። ደለ ትለከፈ ዲብ ልትሸረብ ምንነ ዐለ። ምድር ጽናዕ ወብለቅ ምንለዐሌ ወአፍኔነ” ትብል ሊባኖስ።

ሊባኖስ ለእብ መራር አንሰሐበት ምን ባጼዕ እብ ዐመልየት ፈንቅል ተሐረረት ክም ሰምዐት ለዐለት እት ፈርሐት ፍንቲትተ። እም ጅነ እንዴ ገብአት ዲብ ከልፍየት ዐለት። ለአሰተሸሀደው ወለመስክነው ምሕርበት ትፋቀደት። “ለየም እብ ሰዳየት ዳቅባም ነሐድግ ለሀሌነ ዐድኑ ፈጅር እግል ነኣቅብላቱ” እት ልብሎ ምን አፊት ባጼዕ ወአስመረ ሳሕል ለለደደው ሙናድሊን። ለቆሎም እት አማን ምን ትበደለ ፈርሐት። ህቶም እንዴ ኢልርእው እብ ሐሊፎም ሀዩ ገሄት።

ዲብ ገጽ 8 ልተላሌ...



መቃብለት ርኢስ ኢሰያስ አፍወርቂ . . .

ለቀሎት መናበረት፡ ለእሻረቱ (Index) እግል ኖሰ ከአፎ እግል ትምሰል በ? ለትደህረ ከም እግል ልትበህል ቀድሮ? እብ እክድት ጀላብ እግል ንትሃጌ፡ ዓላብን እብ ዋጅብ እንዴ ሐዩብን እግል ንሸቀዩ ሰበት ወጅብ፡ መግኔሕ እግል ልግበእ እግልን ለቀድሮ እብ ለትደህረ እብ 1800 ነቅፈ፡ ነኡንብት እንቤ። 1800 ነቅፈ፡ እብ ሀውኬ ለመጽእ ኢኮን። ለትፈናቱ ዓላብ ጀምሪን እሉ። 1800 ነቅፈ፡ ላኪን፡ ለኢልትብደል ናይ ደንጎበ ኢኮን። ምኑመ እት ሐምስ ደረጃት ትካፈለ። ምን 1800 ነቅፈ እንዴ ትገባ፡ አሰክ 4000 ነቅፈ ልሄርር። ለ1800 እንብል ለህሉን ማህዩት የምክን እብ ናይ አቅሳም ደረጃት እግል ንትሃጌ እብ እንቀድሮ እንገብእ፡ ላኪን ምህነት፡ አምር ወዕምር እት ወግም እንዴ ኣቴክ፡ ለትደህረ እንዴ ገብኡ፡ ናይ አወላይ ዲግሪ ድሐር አው ድሕርት እብ 4000 ነቅፈ እግል ለኡንብዩ ቦም። ለእት ምግብ ለህሉ ሐምስ ደረጃት ላኪን፡ ሴሩ ገበዩ እግል ልጽቦዋ እልክ ቀድሮ። ሐብሬታትን እት እንጀምራ ወእንሸቀዩ ክም ጊሰነ ሱረት ዋድሐት እግል ለሀበን ሰበት ቱ፡ ‘እሊ ክእነ ገብእ ወኢገብእ’ እንዴ እንቤ እብ አኪደት እግል ንቀርር እንቀድሮ። ‘አኪ አሰክለ ሕፍዝነ ነኣተምም፡ እግለ ቅድዩት ንታከዩ፡ እብልን ነኣሰተብዬ- መጥመጦሪ ህዩ እት ፍዕል ልውዕል’ እንቤ። እሊ ኦሮት ዐገል (Approach) ቱ። ጀሚሶ ማህዩት እት ትሉሊት ባጃት ናይ ሕኩመት ሰበት ተኣቱ፡ ለናይ ሕኩመት ባጃት እግል ኖሰ አክል አዩ ጽዕነት እግል ትርፈዕ ትቀድሮ? እግል ኩሉ እት ሐቱ ኢነት ህዩ እግል ነኣክልሱ ሰበት ይእንቀድር፡ እሰልፍ እብል መገባእ እግል ልግብእ ለቀድሮ ለትደህረው ነኡንብት - መሰለን፡ እብ ዴሽ፡ እብል ናይ ሲቪል ክድመት ነኡንብት፡ እግለ እት ለትፈናቱ አጅሀዘት - ናይ ሕኩመት ወሽብህ-ሕኩመት ሸቂ ለህለ ህዩ እብ መራሕሉ ነኡንብት እሉ እንቤ። እት ዴሽ እግል ነኡንብት ሐቆመ ቀረርኩ፡ እበ ርትብት-አለቡ ነኡንብት፡ እብ ምልሃይነ ህዩ፡ ዲብል ሱብ ርትብት ንዕረግ፡ ናይለ ሱብ-ርትብት እብ ወክድ-ወክዱ እግል ልምእእ ቡ፡ ናይ ኩሉ ምስል እት ሐቱ ኢነት ይእንቀርፉ’ እንቤ።

ዴሽ መናዱቅ ለጽብጠ ሰበት ቱ እንዴ ኢገብእ፡ ለበዝሐ ሸቂ ለህሉ፡ እት አክድን ለህሉ፡ እት ብሩር ነብር ለህሉ ህቱ ሰበት ቱ፡ ዝያደት መትክእመ ህቱ ሰበት ገብኡ፡ እሰልፍ እብ እግል ልትኣንቦት ህለ እሉ ትብህሉ። እት መዲነት ለኑብር፡ ለሐዳ ቱ። ዲብ ብሩር ለኑብር በዜሕ፡ እት ብሩርመ ህዩ፡ መስኡልዩት መናበረት ጼወ ራፌዕ ሰበት ቱ፡ እብ ነኣሰተብዬ፡ ዲብል እት መዳይን ነብር ለህለው ሸቃለ ሕኩመት እብ ምልሃይነ እግል ንምእእ እንቀድር፡ ሰበት፡ ሸቃላይ ሕኩመት እንዴ ባሰረ እግል ልሄርር ሰበት ቀድሮ እንዴ ትብህሉ፡ ክም

ኦሮት ንዛም እንዴ ትነሰእ ተኣንቦተ። ለናይ አማን ማህዩት እበ ለትቀረረቱ ደረጃት ምን ሰነት 2018 እግል ተኣንብት ቡ። እት 2018 እት ፍዕል ትውዕል በህለት ቱ። ለናይ እቅትሳድ ዐቦት ወሄራረ ደማን ለበ ሱረት ለትህይብ ሰበት ይዐለት፡ ማጥመጦሪ እት ሐርሱ እት ዓሱ እት ለትፈናቱ ብዕድ ናይ ወጠን ናይ ዐማር በራምጅ ለልትብህል፡ ምስል ጣቀት፡ ብንዩት-ትሕትዩት፡ ማይ ወብዕድ ለትፈናቱ ክዳማት እበ ልትጸበዋ ክም ኦብያት ሰከን ለመሰል፡ ለሕፍዝ ወክምከምት ሐብሬ እግል ለኣተላሌ ቱ። እግል ኖሱ ሐርስ እቱ ንትሃጌ ዲብ ህሌክ፡ ለበዝሐ ሽዑብን መንበረቱ ለሳይር እብ ሰበት ቱ፡ እት ርዕዮ ለኑብር ልግበእ ወሐርሱ፡ ለኣተዩ ምኑ ሌጠ ሰበት ገብኡ፡ እት ክል ሰነት ለነኣትዩ እተይ አክል አዩ ቱ? ሕኩመት ክም ወሰክ ዲበ ፈርያት ወጠን እንዴ ትቤ ምን ካርጅ እንዴ ትዛቤቱ ለትአመጽኡ አጅናሰ ነብረ፡ አክል አዩ ጸር እግል ለአርሄ ቀድሮ? እንዴ ተኣክድነ ለንትሃጌ እብ በራምጅ ሐርስ ክል ሰነት ህለ እግልን ገብእ? ዝላም እት መራቀብትን ኢኮን፡ ዝላም ክል ሰነት እግል ትትባደል ትቀድር። እተይነ እንዴ ተኣክድነ እግል ንድሌ ይእንቀድር። ክእነ ለመሰል ናይ እሰትህላክ አሸዩእመ ምስል ማህዩት ለልሄር፡ መብዝሐም ህዩ ምን ናይ ሐርስ ፈርያትን ለነአመጽኦም እንዴ ኢገብእ፡ ምን ካርጅ ለነኣገርሆም ሰበት ቶም፡ እሊ ህዩ እብ ዕምለትን እንዴ ኢገብእ፡ እብ ናይ ካርጅ ሰርፍ እንዴ ትዛቤነ ሰበት ነኣመጽኦም፡ እሊ እግል ልክለቁ እግለ ቀድሮ ዕረጉ ትክረዮታት ከአፎ ነኣትመሳንዩ? እሊ ክም ባልሐክ፡ ሐቆሁ እሊ ነኣነብቱ ለህሉን ንዛም ማህዩት እግል ለአሸቂን ቀድሮ እንዴ እንቤ እብ ደማንት ነኣሰእል። ለናይ ሰልፍ መርሐለት ማህዩት እት ዴሽ እንዴ አንብተት፡ እተ ናይ ሲቪል (መደኒ) ክዳማት ላኪን ይኣንብተት። እሊ ዓላብ እሊ እት ልሄርር፡ እግለ ሐደት ማህዩት (1800 ነቅፈ) ለነሰእ ነፈር ሚ ደማንት ቡ? እሊ በዕል 1800 ነቅፈ ሸቃላይ፡ እግል ሐቱ ጎመት ማይ እብ ሐምስ አው እብ 10 ነቅፈ ልትዛበዩ ሐቆ ህሉ፡ ቤት ህዩ እብ 1000 ነቅፈ እግል ለአጅር ሰበት ኢቀድር፡ ለማህዩት ኢትከፍዩ። እሊ ማህዩት እሊ ሚ እግል ትትዛቤ እበ ትቀድር? ባኒ፡ ዜድ፡ ፓሰታ፡ ዐደሰ እግል ትትዛቤ እበ ትቀድር? ሚ ተአመጽእ እልክ? ለልኣትፈክር፡ “እግል ኢንሸፈግ እብ ምልሃይነ ሐሬ እግል ንሕፈዙ ቱ” ለልኣብለናመ እሊ ቱ። መሰለን፡ ማይ ሕኩመት ተ ለትመልኩ - ናይ ሽዑብ ሰበት ገብኡ፡ ማይ ናይ ገቢል ቱ። ማይ ለመልክ በዕል ብሕቶት ኢህሉ፡ “ሀወእ እመልክ” ለቤሌኒ ነፈር፡ “ማይ ላኪን ኢትመልኩ” እብሉ። ማይ ናይ መን ቱ? ማይ እት መዳይነ ከም ልትዘቤ ህሉ፡ እት ሽብህ-መዳይን? እት ብሩር ለህሉ ህዩ፡ አክል አዩ ማይ ነዲፍ ረክብ ህሉ፡ አርእሰ ብዕድ ቱ። ኦሮት 1800 ነቅፈ

ማህዩት ለነሰእ ሸቃላይ ሕኩመት፡ እብል ማህዩት እሊ ሚ እግል ልትዛቤ ቀድሮ? መአሸራይ ቀሎት መናበረት (cost of living index) ልትሐፈዝ ትብህሉ። ክም ተሐፈዘ ህዩ፡ ዐጃይብ ሐብሬ ትጀመሪት። እትለ ደውለት ህሉን መኢፋሉ ለልኣተብል ቱ። መሰለን ቦጣት፡ ምን ማይ-ነፍሒ ማይ ልትዛበዩ። ሕኩመት እግል በርሚል እብ ሕሳብ 47 ሰንቲም ለትኣዘብዩ ዲቦም፡ እት መዲነት በርሚል እብ 50 ነቅፈ ለኣዘብወ። እሊ ህዩ ምእት ዕጹፍ እብ ልትዘቤ ህለ በህለት ቱ። እሊ ቀሎት ምን ሚ ትመጽእ ህሌት? ናይ አውተቡሱ መኪነት፡ ጎመ፡ በጣርያት፡ ናይ ብትሮል... ወብዕድ። እሊ ቀሊል ቱ እሳምዩ ለህሌኩ። እግል ጅናክ ሐሊብ እግል ትትዛቤ ምን ተሐዘ እብ ከም ትትዛበዩ ክም ህሌክ ምኑ ለልትፈንቴ ኢኮን። እበ እመር ለትኣፈግሩ ዲቡ በህለት፡ ናይ መክሰብ ወጥልበት እንዴ ኣቴክ ዲቡ፡ ሊትር ሐሊብ ምን 4 ነቅፈ ወለዐል እግል ልትዘቤ ወኢወጅብዩ፡ ላኪን ረኪሰ ቱ እንዴ ትብህለ እብ 20 ነቅፈ ልትዘቤ ህሉ። ሰበት እሊ፡ 1800 ነቅፈ እንዴ ነሰኣክ፡ ለናይ ደውለት ፈርያት እንዴ አግረህክ እግል ትንበር ኢትቀድር። ለኣዝመት ወለዲበ ጀሬ ኣትዳጋሽ ብዳዐት መብጠር ኣለቡ።



እሊ ኖሱ ሐላል ቱ መኢፋሉ፡ ናይ ኪር ቱ መኢኮን እንዴ ኢገብእ፡ እሊ ቀሎት ከአፎ ትክይድ ህሌት ቱ ኣክረቱ። እሊ ገበዩ እግል ልጽቦዋ ቡ። ሰበት፡ ለማህዩት-ሸቃላይ እበ ትደህረ 1800 ነቅፈ ኣትያመ ሰበት ህሌክ ክራይ-ቤት እግል ተኣድፍዑ ትቀድር? ኢህለዮት ኦብያት ሌጠ ኢኮን። ኦዳም ለወርሰዩ ኦብያት ልግበእ ወለሸቀዩ ለኣትካሬ ህሉ። እብ ፍንቱይ ጼወ ለወደው ሸቃለ እግሎም ለተኣነብር ሓለት ይህሌት። ለኣለት እብ 2000፡ 3000 ወ4000 ነቅፋመ ለትኣነብር ኢኮን። ለበዝሐው ኦብያት ለኢመልኮ ሸቃለ ሕኩመት ወእብ ፍንቱይ ዲብ መዳይን ለህለው፡ እብል ገበዩ እሊ ከአፎ ነብሮ ገብእ? ሰበት እሊ ለቀሎት እት ኦብያት-ክራይ፡ ነብረ፡ ልባሰ ወእሰእን ቀዩምካህ ምን ገብእ፡ ኢትካርጅ። ‘ሕኩመት ዐውል ትድሀር ወትወቅል’ እንዴ ኢገብእ፡ ለቀሎት ዐውል እብ ሚ ትመጽእ ክም ህሌት እግል ትትኣመር ቡ። ቀሎት ሰብብ ለህሉ ህዩ ኣትራቃዝ ዲብ ኣሰዓር ቱ። እግለ እመር ዐውል እብ ዕጹፋት ተኣትባዝሐ ኩትኣዘቤ።

መሰለን ኦሮ በርሚል ማይ 200 ሊትር ጸብዋ ሐቆመ ገብኡ፡ ወእንተ እብ 40 ሰንቲም ሐቆ ትዛቤካሁ፡ እተ ዐውል ርቦ ሰንቲም ሕኔት ትወሰክ፡ እግል ሰር-ሊትር ማይ እብ 10 ነቅፈ ተኣዘብዩ። እሊ እብ እሰወ ምዕያር ገብእ ህለ? እግል ሊትር ሐሊብ ሰለሰ አው አርበዕ ነቅፈ ለኢክሰርክ ዲቡ፡ እብ እሰወ ክያል ቱ 20 ነቅፈ እግል ተኣዝብዩ? እምበልሁመ ቀሎት ናይ ነቅፈ፡ እት ናይ መትዛባይ ሐሊታ ቱ። ኦሮ ዶላር 15 ነቅፈ ልትሰረፍ እት ህሉ፡ ሕኩመት ሚዛን ሰርፍ ወዴት ወእቱ በዋር በህለት ኢኮን። ሰበት 15 ነቅፈ ምስል ዶላር ልትመጣወር ገብኡ፡ ወሚ ትትዛቤ እበ? እተ እብ ዶላር ለሸቂ ድወል ህዩ ዐውል ብዳዐት ከም ቱ?

ኣክረቱ፡ ሐለት መትዛባይ ነቅፈ፡ ቅያሰ ሰርፍ ምስል ብዕድ ዕምላት፡ መትክራይ ነቅፈ ዲብ ሱግ እግል ኖሱ እት ወግም እግል ልእቱ ወጅቡ። ሰበት ለሸቃላይ ሕኩመት ነሰኣ ማህዩት፡ ምን 1800 ነቅፈ ኣሰክ አርበዕ አልፍ ትሄርር፡ ኣክረቱ እሊ ሰላዲ ሱግ ትትክሬ፡ እተ ሱግ ህዩ እብ ኣምኣት ሚልዮናት ክም ትክሬት፡ ለናይ መትዛባይ ሐለት ነቅፈ እት ተሀጎን ትገይሱ። ለትነሰኣ ማህዩት ህዩ እግል ተኣንብረክ

ወመትዛብያይ እብ ቀሎት ሰጋህ ኢበልዐ። ለሱግ ኣዝመት ቀሎቱ ከአፎ ትክይድ ህሌት? ሰበት እሊ፡ እሊ ሱግ እንዴ ይኣትሀደእክ፡ ሸቃላይ ሕኩመት ኣክል እሊ ማህዩት ሰበት ወዴነ እሉ፡ ሰኒ ነብር ህለ ወዐውል ለህብቱ ረክብ ህለ እግል ቲበል ለልትቀደር ኢኮን።

ለመራቀብት ትተላሌ ህሌት። መኪነት ሸሕነቶም እንዴ ነሰአው ዲብ ሕሊል እንዴ ትክረው ሐጻ ልጽዕኖ፡ ወሐር፡ ምን 10-11 አልፍ ነቅፈ እግል ሐቱ ሸሕነት ለኣዘቡ እት ህለው፡ እብ እሰወ ምክያል ቱ? ቦዋ ሰበት መልክ ምን ከዛናት ሕኩመት ወንቃዋ-ማይ ቦዋክ እብ ሕሳብ በርሚል እብ ምተሐት ሰር ነቅፈ እንዴ መልኣክ፡ ምን 50-80 ነቅፈ እግል ተኣዝቤ፡ እሰወ ቃትን ሰምሐ እግልክ?

ለትደህረት ማህዩት ምን 1800 ለኣንበተቱ፡ ሕኩመት ግረ ኢትብልሱ። ሕኩመት ገለደ ኢትጠልም። እብ ለትፈናቱ ኣሰባብ 500 ነቅፈ ማህዩት ነሰኣ ለዐለው፡ ለፈርግ ናይ 1300 ነቅፈ እንዴ ትወሰክ እሎም፡ ናይ ክልኦት ሐል ለተርፈት ምናም ማህዩት እግል ልንሰኣ ቦም። “ለልኣትቃብል” ለልትብህል ህሉ፡ ክምሰሌሁ ለልብል ቃትን ሕኩመት ኣለቡ። ኦዳም እብ ኖሱ ለከልቀዩ ቱ። “ሰምሐ” ገብኣት እልክ ከላሰ እት ዴሽ ኣቅበልክ እብ 500 ነቅፈ እግል ትሸቂ ቱ ለልብሰክ ምን ቱ? ክል ሸቃላይ ሕኩመት እተ እሊ ህለ ለህሉ፡ ኣሰክ ሰነት 2021፡ ማህዩቱ እበ ተርቲበ እንዴ ትሳኔት እሉ እግል ልንሰኣ ቡ። ዐቦት እቅትሳድናመ፡ ምን እሊ ሰነት ጎነ ኣሰክ 2021፡ ዐቦት እብ “ኣፍረዮት” ናይ ኩሉ መጃላት እንዴ ወሰክነ ኣሰክለ ትወቀለት እግል ነዓብዩ ለሰተትናህ ገበይ እበ እግል ኒጊሰ ሌጠ ወጅብ። ኩሉ ኦዳም እግል ልፍሀመ ለቡ ቱ። ፍሂም በህለት ህዩ ሸቅል ቱ። እቅትሳድነ እብ ናይ ክሊነ ወራታት እንዴ ትደቀቡ፡ ኩሉ ሀድኦ ክም ትብህሉ፡ ለወሰክ ማህዩት እት መናበረት ሸቃለ ተቅዩር ተአመጽኦ። ሸቃላይ ሕኩመት ሌጠ ኢኮን ለልኣፈሬ፡ ሽዑብ ቱ ለልኣፈሬ።

እት ሸቅል ዲብ እንቶም፡ እብ ለትፈናቱ ኣሰባብ ማህዩቶም ለኢረክበው ህዩ፡ ምን ሰነት 2018 እንዴ ኣንበተት፡ ለትትህዩቦም ከሕሳ (ኮምፕንሲሽን) እግል ልንሰኣ ቱ። ሐቆህ እተ ሰልም ንዛም ማህዩት እንዴ ኣተው፡ ማህዩቶም እግል ተኣተላሌ እሎም ቱ። እሊ ላኪን፡ ከላሰ ሕሉል ወዴነ እሉ ለልኣተብል ኢኮን። ምን ሰነት 2021 ወሐር፡ ቅድዩት ማህዩት ለነሃርስ እቡ ኣሰባብ ምኑ እንዴ ኣዘምኑ፡ ክል ሸቃላይ ዐውል ለህብቱ እተ ረክብ እቱ ደረጃ ምን ብጽሐት ወኪን ሐራን ኣለብኩ። እብ ሽብህ-ሽብህ እቅትሳድነ እት ነሐሰን፡ መንበረት ኦዳምን እግል ንቀደር ብኩ። ኦብያት፡ እሰትህላክ፡ ነብረ፡ ልባሰ፡ ኣሰክ ናይ መትፋግዮት፡ ተዕሊም፡ ዓፍዩት ወብዕድ ክዳማትመ እትሊ መጃል ለልኣቱ ቱ።

ዲብ ገጽ 10 ልተላሌ



አርሄት ወአዳሌት

አርሄት፡ አርሄት ሕቼ የም ሽቅል ቤ አለብኪ ማሚ፡ አካፎ ጀሪደት ቀርአኪ?

አዳሌት፡ ቅራኦት ሽቅል ቤት ሚ ትከሊኢ ወቅት ሐቆ ነዘምከ እግለ አርሄት ሕቼ።

አርሄት፡ አሽቃል ቤትኪ ክሉ ኦትመምኪ ከእግል ቅራኦት ወቅት ረከብኪ በሀለቼቱ።

አዳሌት፡ አወል ሐቱ ሽቅል ቤት ዐለት እግልዬ ወሽቂክወ። እምዬ እግል እስዴ ህዩ ዕደት ሐጸብኩ። አዜ ህዩ እለ ጀሪደት ዐጅብተኒ ከእሊ መዕሉማት እቀሪኢ ህሌኩ። እንቲ ህዩ ሽቅል ቤት ኦትመምኪ ማሚ?

አርሄት፡ ኦነ ላቱ ሽቅል ቤት የዐለ እግልዬ የም። ምናተ ምደርሰነ

እሊ አርእሰ እንዴ ቀርአኩሙ ወፈሀምኩሙ ምጽ ቤሌ።

አዳሌት፡ ከእሊሙ ሽቅል ቤት ቱ ኢኮን። አዜ ቀርአክዩ ማሚ?

አርሄት፡ ቅራኦት ዲ ቀርአክወ፡ ላኪን ለኢትፈሀሚኒ ከሊማት በዝሐ ዲቡ። አዜ ምንኪ ዲክሸነሪ እግል እንሰእ ወእብ ተርጀመቱ እግል ትሰደይኒ ማጸትኪ ህሌኩ።

አዳሌት፡ ናይ ሚ ማደት ቱ?

አርሄት፡ ናይ መሕበራይ ምህር፡ ሰሩ ምንመ ቀርአኮሁ ኢትፈሀሚኒ።

አዳሌት፡ እንዴ አርኢኒቱ፡ ኦነ መሕበራይ ምህር ሰኒ ልትፈሀመኒ ዐለ።

አርሄት፡ እሊቱ፡ እለን ለዲበን እሸርት ህሌኮ ለኢትፈሀሚኒ ከሊማት ተን።

አዳሌት፡ እንኪ እለ ጀሪደት ሐፊ ምስል እግል ንቅርኣቱ። አዜ እሰልፍ እኪ እግል አፍህም ንዲ እንሰር ቅረቢ።

አርሄት፡ አማንኪቱ ሳዐት መድረሰት እንዴ ኢተምም ዲብኩ። እሰልፍ አፍህሚኒ።

አዳሌት፡ አዜ ትፈሀሚኪ ማሚ።

አርሄት፡ ሰኒት ትፈሀሚኒ አዳሌት ሕቼ፡ አናመ እንቲ ክም ትሰዳኒ እንዴ ደመንኮ መጸኮኪ። ያረ የም ቀደም ክሎም እግል እሸርሐ ሌጣቱ።

አዳሌት፡ አሰናይ ትፈሀሚኪ። አዜ ንዲ እሊ መዕሉማት ለዲበ ጀሪደት እቀርኡ ዐልኮ ምስል ንቅርኡ ሰኒ ቱ።



ሰራይር



ሰራይር ምነ ሕፋን ደሙ ላቱ ሐዋናት እት ገብእ፤ እንዴ በርር ለገይሰ ወእት አዳም መደረት ለኢወዴ መክሉቅ ቱ። እት ዐለም ሐድ 10,000 ለገብእ አጅናሰ ሰራይር ህሌ። ምን ሰራይር ለዐቤት ሰፊረት ሰገን ተ። ለነአሸት ሰፊረት ህዩ ሃሚንግ ትትበህል። ሰራይር እግልሚ በርር አው ነፍር እንዴ እንቤ ሓሰባም እንገብእ፤ ለለአነፍሩ ሰቡብ ዓጭሞታቱ ለቀቡቱ ጋንጊ ቱ። እሊ ህዩ ቀላለት ሰበት ከልቅ እግሉ ቱ። ሰራይር እብ ጠቢዐቱ ለናሱብ ምስሉ ምድር እንዴ ሐረ ዲቡ ነብር። እብ ዓመት ህዩ ምድር ጋምል ወጣልል ፈቱ። ሐትሐቱ ዶል ዲብ ዘርእ መደረት ለአጀራ።



ነብረ እዲነ እብ ሕዋሌ ትጥዕም

መደት ሐቱ ዕጋል ወሸባባት ናይ ሐቱ ዐድ ምስል ልትሃክኮ ወለሀርጆ ዐለው። ምርት ከእብ እንክሩ ሐካኪቶ እት ለአምመጽእ ወአምሳል ወንካት እት ልብል ለወቃም አምሰው። እት ምግብለ መሐበር እናሰ ሰኒ ላብብ ወፋህም ዐለ። ምርት ምነ መሕበር፤ ክእነ እት ልብል ትሰአለዩ፤

“ይበ ኦነ ሐቱ ሰኣል ተሐይለኒ፤ እለ ሰኣል ህዩ በሊሰ ምንክ እስእዩ” ክምሰል ቤለዩ፤ ለእናሰ እግል መደቲት ሐቀለ ሐሰበ በለ ምንክ ጠይኡቡከ ምን እንቀድር እንበልሰ ወምን ኢነአምር ህዩ ሓይሳም እት ፍንጌነ ህለው ‘ጀርቤ ሰከይ ሚ ትከልእ፤’ እት ልብል ራዲ ክምሰል ቱ አሰአለዩ። ለነፈር ህዩ ክእነ ቤለ፤

“እብ አፋሁ ለፈቱከ ወምን ቀልቡ አው ደሚሩ ለፈቱከ እብ ከአፎ ልትአመር ወልትፈናተው፤”

ለእናሰ እግል ሰኣል ሰኒ እንዴ ሰምዐዩ፤ እብ ከአፎ ክምሰል በልሱ ሐሰበ፤ ህቱ በሊሰ ለልብሉ ህዩ መጽአዩ። እግል ፈታሆም እብ አፋሆም ላተ አንፋር እሰልፍ ዐዘመት እንዴ ወደ እግሉም ምስሉም ተዐገለ። ለነብረ ምነ ነበሪት ለብዕድ ለትፈንጌት ዐለት። እከለት፡ ሐሊብ፤ ሰገ፡ ሩዝ ውብዕድ እት ልትጸበር ለእናሰ መዲደት አምጽኦ እግሉም። ምርት ከዲብ ዝብድየት እንዴ በልሰ እግሉ፤ እግል ክል-ምናም

ምን ምትር ወለዐል ለትገብእ መንክ ሀበዩ። ለመዲደት እብለ መንክ(መዕለቀት) እግል ልሰተወ ህዩ አማውር ሀበዩም።

ለአንፋር እግል ልሰተው ምንመ ጀረበው ለመንክ ሰበት ፊመት ደለ እግል ጀቅፈው እት ምድር ትክዴት። እንዴ ሸናቅሮ ዐለው እብ ሰፍራሆም ጀረጌሕ ገብአው።

ለእናሰ አዜመ እግል ምን ልቦም ለፈቱ አንፋር እንዴ ዐዘመ፤ መዲደቶም ባለሰ እግሉም እግል መንካታት ለረያይም ሀበዩም። ለሰብ ለቱለል ሰበት ፈደበ እቶም እሰልፍ እግል አድሕድ ገንሐው። እግል ልባሰሮ ጀረበው። ሕኔት ምርት ከእግል ኖሱ ሰቱ፤ እበ መንክ ለራያም ምርት ከእግል መልሀዩ እግል ለአሰቱ ጀረበ። ለመልሀዩኡ ረዩሙ ሰበት ቱ ለመንክ እግል ተሰትዩ ትቀድር። እብ ክእነ ህዩ እግል አድሕድ እት ለአሰቱ ምነ መዲደቶምም ትደረረው።

ለእናሰ እት ምግቦም እንዴ ገብኦ ድማን ወድገለብ እት ልትወለብ፤ “ሰምዑኒ አውኪር፤ እት ነብረ እዲነ እንዴ ተዐገለ ርሐ እግል ለአጽግብ ሌጠ ለልትበገሰ ፍሉል እት እንቱ ነብር። መልሀያሙ እግል ለአጽግብ ለጀርብ ላተ፡ ህቱ ወጸሩ ጽጉባም ቶም። ነብረ እዲነ ሕዋሌ ክምሰል ተ ኢትቅወው እት ልብል መክረዮም።

ገሌ መዐሉማት እብ ክሱሰ ምሒጣት

ማይ ሐድ 71% ምን አርድ ጽብጥ። ማይ ዲብ ምሒጣት፡ አብሐር፡ አንሃር፡ መራታት ወወወለ ልትረከብ። እምበል እሊመ ማይ እት ረኣሰ አድብር ውቁል እብ ሸክል በረድ፡ ዲብ ፍደእ እብ ሸክል ተን (ሃፈ)፡ ዲብ ምድር ህዩ እብ ሸክል ጠላለት ልትረከብ። ማይ ለአግደ አሳሰ ናይ ሐያት ቱ። ህቱ እግል ኖሱ አርወሐት አለቡ፤ ምናተ አርወሐት እምበልሁ ኢትነብር።

ዲብ ምሒጣት ለልትረከብ ማይ ሐድ 1.35 ቢልዮን መክዑብ (መሰለሰ) ኪሎምትር ገብእ። ፍይሐ

ናይ ምሒጣት ሐድ 362 መልዩን ኪሎምትር መረበዕ ገብእ። ዲብ ቀበት ምሒጣት ለልትረከብ አድብር ምነ ዲብ ምድር ለልትረከብ አድብር ልትወቀሎ። መትወቃል ናይለ ዲብ ምሒጥ ሰላም ለልትረከብ አድብር ሐድ 10,205 ምትር ገብእ እት ህሌ፡ ለትወቀለ ደብር ኤሸረሰቲ 8,848 ምትር ምን ጠፋሐት በሐር ቱ። ለትደሀረት ኦካን ዲብ ምሒጥ ሰላም ለትትረከብ እት ትገብእ፡ ቻለንጀር ዲፕ ትትበህል። እለ ኦካን እለ መትደሃረ 10,920 ምትር ምን ጠፈሐት ምሒጥ ገጽ ተሐት ተ።

ህኩይ ወከሳይሩ


- ህኩይ ፍክር ወሐንገል እትቡ ምን ሰኔት ተርፍ
- ህኩይ ፋርሰ ህግዩ ወሐምቅ ሽቅል ቱ። ነፍሰ ሐቆ ተአገግሕ ወትጀግሕ፤ ዝያደት ብለዕ፡ ዝያደት፤ ህግዩ ወሰካብ ትፈቱ። በዐል እለን ህዩ ሴመ ኢለአወቄ፤ እምበል ለምቱ
- ህኩይ አዳም ኢፈትዩ፤ መሳኒቱ ኦክለ ሀነው ምኑ ረይሞ፤ አዳም ለሐግለ ህዩ ክሉ ለሐግል፤ ርዝቅ ዐለም አዳም ቱ ወእሊ እብ ሽቅል ወምሰንዮት ትረክቡ።
- ህኩይ ሰበት ኢሸቄ ኢከሰብ፤ ዕያል እግል ልውዴ ህዩ ኢቀድር። ሰበት እሊ ህኩት እብ እዴ ኖሰ ነፍሰከ ቀቲል ቱ።
- ህኩይ ረቢ ለአብዩ ወአዳም፤ ሰበቡ ህዩ ሰበት ኢረክብ ሰኔት እግል ልውዴ ኢቀድር። ምስኪን ኢሰዴ ወእግል ፈንጎሕ ኢወዴ።

ከገድም ህኩት ዐዶ ክምሰል ተ እንዴ ኣመርኹ፤ መዐጸም ወወቀይ ንታሌ፤ እግል ትጠዐም ግንዳሌ፤ ንክደም እምበል ሕላሌ።

አጥዐሚቶ

መደርስ እግል ደረሳሁ ክእነ እት ልብል ትሰአለዮም፤ መደርስ - አዳም ትም ብህል እት እንቱ፤ እብ ህግዩ ጨጭ ለልብል ነፈር ተአምር ማሚ፤ ደረሳይ - ኦነ ሰኒ አምር። መደርስ - ሚ ነፈር ቱ እንዴ አሰእለኒ። ደረሳይ - አዳም ትም ብህል እት እንቱ እብ በይኑ ለልትሃጌ ነፈር መደርስ ቱ። አዳም ምን ኦተንሳይ ልትዕብ ወመደርስ ምን ህግዩ ኢጸግብ።





አቅሊም ግብለት በሐር ቀየሕ ወመካራቱ

2ይ ወናይ ደንበስ ክፈል



ምን ስኒን ወድኒን እንዴ አምበተ ቀደም አትራክ ወሐቀሆም ለዐረው ምስተዕምረት፡ ቀባይል ዐፋር እብ ናይ ኖሶን አግቡይ ወፍተሓት ለልትመቃረሕ ለትፈናተ ሸየም ወዐዋዲ እዳራት እንዴ ተበዐየ ልትመቃረሕ ክምሰል ዐለየ ልትአመር። መሰለን መምለክት ረሓይታ እብ ደርደር በህለት ሱልጣን ለልትመቃረሕ ንዛም፡ ምን ታጁራ ጅቡቲ አስክ ዕንጋይቶ ድዋራት ዐሰብ ለትትመደድ እዳረት ክምሰልተ ልትአመር። እሊ ህዬ ምን ስኒን ወድኒን ለአምበተ ወአስክ እለ ለአተላሌ ለህለ ንዛም መቅሬሕ ቲ።

እብሊ ቆምየት ዐፋር ኖሶም ለልትመቃረሕ ወልትመረሕ እቡ ዓዳት ወለመድ ምን በዲር ለዐለ ወአስክ እለ ለአተላሌ ለህለ ክምሰልቱ ልትአመር። ብዙሕ አግማም እብሊ ንዛም አው ቃኑን ለሐልፈው ወእግል እሊ ምን በዲር ለጸንሐ ዓዳት ዲብ ልትወራረስ ምን ጂል ዲብ ጂል ዲብ ለሐልፍ ወዲብ ኩብር ለኩብር ዓዋዲሆም ለሐሸሞ። ክምሰል ተአምርታ ናይ እሊ መቅሬሕ እሊ ዲብ መትሐዳር ጋሽ ወዲብ ኖሰኖሶም ለህለ እሊም ሸረፍ ወሕሸመት ክምሰልሁመ መትሰዳዳይ፡ ለሸርሕ ስኒ ዐዋዲ ህለ።

ገቢል ዐፈር ዲብ አጀኒቶም ለህለ እሊም ራዐዮት ወአግቡይ ዕባያት፡ ዲብ አስከቦት አከይ መቅሬሕ ለልተቡዑወ አግቡይ፡ ዲብ ሕፍዘት ዕጩይ ወሐዋናት ከደን ለቦምቱ መትአያሱ፡ መሰለን ክምሰል ከረ አስጉን፡ ሸውክን፡ ዓሳታት፡ አቡሰላማ ውበዕድ፡ ዲብ ዳፍያት ወሕደቶም ወዲብ ዳፈያት ምን ዌረት እብ ፍንቱይ እግል ሸባን ለጉበእ ረቦየት ገሌ ምን እሻረት እዳረቶም ወሐዳረቶም ቲ።



ምን ሐልየት ሐባብ ዐድ ህብቴስ ላቱ መሐመድ ወድ መዲን እግል ምስለ እግል አፍ ሓሬን ለሐለየ ሕላየት እንዴ ወሰከ እግል ግርመትመ እለ ለተሌ አትዐረ።

እግል ለካልእት ወድ ሸኔን መዲን ሰልም ምመንታይ አጫብዕ ማይማዮ እልብ ፋግር ምን ዐጥላይ ሸካኒ ናሊታት ተሓቱ ረዐፍ ወጥራይ ሰጋድ ዐጌብ እርተ ትከለአዩ ለሐረሰታይ አይናብ ቅሎ በረሽም ለብለብ ወዲ ከም መርዳይ ቀየሕ ዐሎብት ለትናጥጠ ወድ መዐሰራይ ቀየሕ ሰገ በቃሪ ትትዐራቤ እብ ገዳይ ቀይሕ ጁከት ሐላቂ ማሌ ፋግረት ምን ትርካይ ቀየሕ ፍሬ ቅናጦል ትነሳነሰት ምን ሐጋይ ለኒን እንዶ ተርእየ ከትከትናየ ምን ሕልጣይ ለቅርቅር እንዶ ትትለሐ በ ትጉበእ እለ ረአስ ዕጫይ ገሩን ልብለ ወጸዐድ ሐሌ ልብለ ወሐላይ ደሀብ ነሰአ ወሶሚት ሸመት ህይበ ውብላይ ኢደሌኮቱ ለገፍከ ሚ ህሌከ ምን መሃይ ድግም አለቡቱ ለዙዕዬ እምበል አተንሳይ።

ሓላት ሀዋእ አቅሊም ግብለት በሐር ቀያሕ

አቅሊም ግብለት በሐር ቀያሕ ዲብ ትሮፒካል ክፋል ዐለም እበ አር እንክር፡ ወእበ ብዕድ ዲብለ እግል ምፍጋር ጸሓይ አፍሪቅያ እንዴ ከፍለ ለለሐልፍ ወደግ ሰበት ህለ ለቀረ ወይቡስ ሸማላት ለህለ ዲቡ ደዋይሕቲ። ዲብ ገሌ አውካድ ላኪን ምን ምሒጥ ህንድ ብሩድ ሸማላት አስክ በሐር ቀያሕ ሰበት ለሄሬ ዲብ እሊ አቅሊም ለትፈናተ አዋይን ዘላይም ልትረኡ።

ሒን ሐፋነት ዲብ እሊ ቅሊም ረኡን ምንገብእ፡ ምን ወርሕ 5 አስክ ወርሕ 10 ሕፋን ሓላት ጀው ህሌት፡ ሓፋነት 41 ዲግሪ ሰንትግሬድ በጹሕ።

ብሩድ ሒን ምን ወርሕ 11 አስክ ወርሕ 4 እት ጉበእ እሊ 23 ዲግሪሰንትግሬድ በጹሕ።

ናይ ዝላም ሒን ዲብ አቅሊም ግብለት በሐር ቀያሕ ረኡን ምንገብእ ዝላም ዲብ እሊ አቅሊም ክልኤ ዶል ዘልም፡ እሊ ህዬ ዝላም አውል ወከረም ልትበህል። ዝላም አውል ምን ወርሕ 2 አስክ ወርሕ 12 ትጉበእ እት ህሌት ዝላም ከረም ህዬ ምን ወርሕ 8 አስክ 10 ትተላሌ።

ናይ ሰነት ተቅዩም ዝላም ዲብ አቅሊም ግብለት በሐር ቀያሕ 300 ሚሊሚተር ዲብ በጹሕ፡ ለትወቀለት ዝላም ህዬ አስክ 405 ሚሊሚተር ትበጹሕ መሰለን ዲብ ሰነት 1997 ለዘለመት ዝላም ሐቲ ምኑ ቲ።

ሰነን አው ሸዑብ አቅሊም ግብለት በሐር ቀያሕ

አሳስ ሸዑብ አቅሊም ግብለት በሐር ቀያሕ ቆምየት ዐፈርቲ። ምን ብዕድ አቃሊም ኤረትርየ ለመጽአው ቆሚያት ትግርኛ፡ ሳሆ ወትግሬመ ዲብ እሊ አቅሊም ወእብ ፍንቱይ እብ ሐድ ዕልብ ዲብ መዳይንለ አቅሊም ኑበር። ብዝሐ ሸዑብ አቅሊም ግብለት በሐር ቀያሕ ሐድ 72 አልፍ እት ጉበእ፡ መንበረት ሸዑብ ምስል ፍይሐ ምድር ልትረኡ እት ህለ ሐድ 3 ነፈር ዲብ አር ኪሎሜተር መረበዕ ኑበር በህለት።

መናበረት ሸዑብ አቅሊም ግብለት በሐር ቀያሕ

መናበረት ሸዑብ አቅሊም ግብለት በሐር ቀያሕ 75% ዲብ ርዕዮ ለአተንከበት መናበረት ለሓልፎ ዲብ ህለው፡ ለበዝሐ እብ ስብክ ወሰግም ለዐይሸ። ዲብ ጀለቦት ዓሳ አሪ መዓድን ወጩውት ውበዕድ ለአተንከትበት መናበረት ለለሓልፎማ 25% ጉበእ። ለዲብ ግንራራብ በሐር ለኩብር ሰነን እሊ አቅሊም ዲብ ጀለቦት ዓሳ ወምሰሉ ለልጸበጥ ወራታት ነሽሮ።

አሰል ሸዑብ ዐፋር

ለአሰልዩን ሰነን እሊ አቅሊም ላቶም ቆምየት ዓፋር፡ ዓያይማረ ወዓጎይማረ ለልትበህሎ ክልኦት ከፊፍል ለቡ እግል ብዙሕ ቀባይል ለከምክም ሸዑቡ። ገሌ ምነ ዐባዩ ቀባይል ቆምየት ዐፋር ረኡን ምንገብእ፡ ዳምሆይተ፡ ዳሂሚለ ወሐደርጥ እግል ልትህደግ ቀድር።

ሸባብ



ሕዱግ ሰሌማን

ሓይሳም ቂርአት ሰፍሐት ሸባብ፡ ምስል መሰኡል ሸባብ አቅሊም ግብረት በሐር ቀየሕ፡ ሻብ ዑሰማን ዑብደልቃድር፡ እብ ክሱስ መትነዛም ወወቀይ ናይለ መሕበር ለገብአት መቃበለት፡ ካልአይ ወናይ ደንጎባ ክፈለ ልተላሌ።

ሰአል፡ በርናምጅ ሰልፊየት ኮፎቱ ወሚ ፍገሪት ትትረኩብ ምኑ እግል ሸባብ?

በሊሱ፡ እሊ በርናምጅ እሊ ምን ለአሰብዬ አርበዕ ሰነቱ እቅሩብ ሀላ፡ አወል ምህር ልትሆዩ፡ ሐቆ እሊ ልጅነት ሀሌት እብ ከፎ እግል ልሸቂ እብ ቀድር? ፈጅር አሰብሐ እንዴ ትሰለፈ እግል ልብለሰ ሐቆ ኢቀድረ መሰኡልየት ዲብ ምንተ? መሻክል ሰበት ከልቅ፡ ቀደም ክሉ ተእሂል ልትሆብ። ሐቆ እሊ ደሐን ፍላናይ እንዴ ሰለፈ ‘ግል ልብሌሰ ቀድር ልትወጀቡ ልንሰእ ልብሎ ለልጅነት ወነሰእ። ሐቆ እሊ ህዩ ሕነ እንሳድቅ እሉ ወአስክ መክተብ መርከዚ መሕበር ወጠን ሸባብ ወደረሰ ኤረትርዮ ልትለእክ ወልትሆብ። እግል መሰል አዜ ሰማን ነፈር ሰኡላም ህለው ወ እግል ልንሰኦ አስክ መክተብ መርከዚ ለአክናሆም። አዜ እሉም ዕውታም ለህለው አንፋር ምስል ቱለል ሰላም፡ ነቲጅት ሰኔት እግል ልርከቦ ቀድሮ።

ሰአል= ሰልፊየት እግል ግድፍም ወመሳኪንተ ለትትሆብ መእግል ክሉ ትወጅብ?

በሊሱ፡ እብ ሰለሰ ገበይ ልትረኡ፡ አዋላይት ለተእሂል ናሰአም፡ እት ክድመት ወጠን ዋጅቦም ለአትመመው ልትሆብ። እግል መሰል 1) ክድመት ለአትመመ/ት አው ክድመት ወጠን ጸብጠቶም ለኢገአት 2) ምን ዴሽ ለሰርሐ/ት 3) እብ አዩ አሰባብ፡ ሐርብ ልግብእ፡ ሕማም ውብዕድ መሰክነ ገሮብ ለቦም እግሉም ልትሆብ። እሊ ህዩ ልጅነት እንዴ ረኡቱ ወእንዴ ተአከደት ምኑ ገብእ።

እብ በይንኅ ህዩ ይእንወድዩ፡ ምስል ውዛረት ዐመል ወረዐዮት እጅትመዕየት እንዴ ትፋሆም፡ ሕነ ተቅሪርን ነሓልፍ እቶም ወህቶም እንዴ ሳደቀው እቱ ለበናምጅ ክም ተምም ወዱ። ገሌ ሸባብ ህዩ ተእሂልመ እንዴ ኢነሰእ እግል ነሆም እንቀድር። ውሊድ ሹሀደ፡ ምስክነ ገሮብ ወዐቅል ለቦም ሸባብ እንዴ ረኡነ ከም ልትሆዩ እንወዴ። ዝያድ ላኪን ዲብለ እንዴ ሸቀው

በልሶ ለእንብሎም እንረክዝ፡ እግልሚ ብዝሓም ሸባብ እብ ሸቅል ነፍሶም ለቃድረም ሰበት ህለው። አውለውየት ለትሆዩ ላኪን ለእግሉም አድረሰነ አንፋር ቶም፡ ወእበ እሉ አፍገርን ቀዋኒን እት ዐመል ልተርጀም።

ሰአል፡ ሸባብለጸር ምጅተመዕ እት መሸንገሎም ቱ ከእግል ዓይላት ሹሀደ፡ ምስኩናም ሐርብ ወሕገዛም ሚሰዳይት ወዱ?

በሊሱ፡ እሊ ሱአል ምህምቱ፡ ምነ ወራታት መሕበር አሮቱ፡ ደረሰ ልግበኦ ወሸባብ ሸቃለ ሕኩመት፡ እግል ሰዳይት ሕገዛም ምነ አወላይ በርናምጅ እት አምዕላይ መንበርሆም ወእት ጅድወሎም ለርቱግሙ ዳይቱ። ከሰበት እሊ እትሊ አሸቃል እሊ ለገብእ ኬወ እብ ቀሊል ለልሸርሕ እትኒ። እግል መሰል ለከርበ ወለፈርሰ አብያት ዓይላት ሹሀደ ወመሳኪን ለአሰነ፡ ግሪህ ዓኢላት ሹሀደ ወሕገዝም እብኬወ ለሀርሞ፡ ወዓመተን እግል ክሉ ለሸዐብ ብዙሕ ሰዳይት ወአትናያት ወዱ። ወቀዮም እብለ መቃበለት ዮም እንዴ ወሰፍኳህ ለልትክለሰ እትን፡ ዲብ ክለ ወጠን ልትሸቂ ለሀለ ዐማር እግል ኖሱ ሻሁድቱ። ዐለም ለአትፈከረ ተእሪክ ወውሕደት እሉም ሸባብ እብሊ ክሊማት ሐድ ኢለሸረሕ።

ደረሰ፡ ለሀለ እሉም ወቅት እንዴ አትመቃር ሐው ኮፎ ምስል ሸዐብ ሸቂ ወእብበቢሁ ምስለ እግላ ሸዐብ ለመረሐ አንፋር እንዴ ትፋህመው እት ሰዳይት ሕድ ለአደም፡ እብ ጅድየት ልትሸቂ እቱ። እት ወቅት መናሰባት ዐቢ ክም ዓያድ ወጠን መሰል መሰኡልየት ናይለ ሸቅል እግሉም ትትሆብ። እግል መሰል ዒድ መተአሳስ ሰውረት - ሐቱ ሰብተምበር፡ አምዕል ሹሀደ፡ ዒድ ሕርየት፡ መሀረጃን ሸባብ፡ መሀረጃን ወጠን . . . እሊ ክሉ መናሰባት እብ ሸባብ ልትሸቂ። እግልሚ፡ ረኡይ ወሰማዕ ሙጅተመዕ ህቶም ምን ገብአው። ሪም ምድር ወኢረኪብ መዋሰላት፡ ጽኖዕ መካሪት ምድር እንዴ ኢተክሎም እብ ምርወት ወኤማን እንዴ ኢልትሐለሎ

ወቀይ ወመትነዛም ሸባብ አ/ግ/በ/ቀየሕ



ሸቂ ህሌው። እሊ አሸቃል እሊ እብ ልትዐውቶ ለሀለው ምን መሕበር ለርይም አለቦም፡ ለሸባብ አንፋር መሕበር ቶም፡ ለዐባዩመ ህዩ መሳኒት መሕበር ልትሐሰሶ።

ሰአል፡ እት ደንጎበ እት ሸባብ ሚ ልእኩት ተሓልፍ?

በሊሱ፡ ሰልፍ ወቀደም ክሉ ሸባብ እብታዕሊም እትፋነዮም። ዮም እሊ ዐለም እብ ቱ እሊ ደረጃት ዐቦት ባጽሐት ለህሌት። ሸባብ ድዋርም እግል ለአምሮ ሀለ እግሉም። ዐለም ከፎ ትገይሰ ከም ህሌት አመሮት ለትሐዝዮም። እብ ክሱስ ሰያሰት ልግበኦ ወእጅትማዕየት እት ደውለትነ ልግበኦ ወእት ድወል አጉዋርን ወዐለም ለሀል ተጠውራት ናይ ክል መጃል እንዴ ረኡነ፡ ለሰኔት እግል ንታለዩ ወለእኪትተ ለእንብለ እግል ኒሪም ምነ፡ ሕርያን እግል ንፈርግ ሚ ሐሰል ከም ሀለ አመሮት ለትሐዜ።

እምበል እሊ መሕገዝ፡ ሕማም ውብዕድ እግል ለሀሌ ቀድር። እሊ ክሉ እንዴ ከሀልነ፡ እት መርሐለት ከም እምበጽሕ ሐቆ ወዴነ፡ እግል መጽእ አጅያል ሰኔት ነአወርሱ ከም ህሌነ ንተአከድ። እት ተዕሊም ፍገሪት ሰኔት ሸቂነ ምን ገብእ፡ ሙጅተመዕ ዳርስ እግል ነአፍሬ እምቀድር። እት ዓፍየትመ፡ መዋዋን ዑፋይ እግል ለሀሌ እነ እት አትፈዛዕ ዶርን እግል ኒዴ ብዝ። ሙጅተመዕ ፋዜዕ ወአምር ዶል ለሀሌ እግልነ እት ዐማር ወዐቦት ዝያድ ወኢድመዕነ ለልብል ረኡይ ብዬ። ሕነ ሸዐብ ኤረትርዮ፡ ወእብ ፍንቱይ ሸባብ ለጅብህት ሸዕብየት አውረሰተናቱ ሕሸዋታት እት አተረዶት ወሕደትነ ክም ሐሊትነ ንትነፈዕ እብ። እብ እማነት ሹሀዳነ

ለእንሸቂ ሰበት ሕነ ህዩ፡ ክል ኢነት እብ ደሚርን ንፍቀዶም። እብ ሰሜቶም፡ እግል ሕሸመት ወዐማር እሊ ወጠን ገለድነ ንኦትሐድሰ እብል ወእትፋኔ።

እትደንጎብ፡ ለእሌን ሰሚኑ፡ ውዛራት፡ ጀብህት፡ ወክሎም መሓብር፡ ወመአሰሳት እተ እሉ ወዱ ምስልነ መትሳዳይ እግል ሐምዶም እፈቱ ወሸክረን!!!

ንዳል ወኢመትሐላል ዮም...

ምን ገጽ 4 ለተላለ

ዮም ክሉ ለሀይ እንዴ ሐልፈ፡ እት ሕርየት ወእስትቅላል ለተርፈው ሙናድሊን መሕበርም እንዴ አሰሰው እግል ልትራከቦ ምን ቀድረው ክም ፈድል ዐቢቱ ለተሐሰቦ። ንዳል ቀዳም እብ ዐውቱ አትመምናህ፡ ንዳል ሓርመ ገጽነ እት ዐውቱ ሀሌነ ትብ።

እግልሚ፡ ህተ እም ሐምስ ጅናተ፡ ምን ሸቅለ ኢበዋረት ብእሰ እት ድፈዕ ወጠን ክል ዶል በዐል ረዩም ምን ገብኡ፡ መጅብ ክም እም ወአብ እንዴ ገብኦትተ ለዓቤቶም። እት ትሸቂ፡ እት ትመሀር፡ እት ትወልድ ለዕምር ሸበት ክም ሓልፈት፡ አዜመ ለዐበው አሰክ አካኖም ጸብጦ እብ ገበይ እግል ሊጊሶ ወርሐም እግል ልቅደሮ እት ንዳል ሀሌት። ለህበታመ ፍሬ ተሀይበ ሀሌት፡ ውላደ እት ለትሐመድ ደረጃት ባጽሓም ህለው።

ለባኖስ ዮም ለእት ሚዳን ተዐለመቶ ምህር ኢጋር ሐኪም፡ እት ነርስ ወቀሉቶ። ምን ሳምናይ ለሐድገቶ ምህርሃመ ወሰኩት እቱ። አጀኒተ ነላይሽ እት ህለው ምስለ ተሐድጎም አቦት አው ሴድያይት የዐለት እሊ፡ እግል ረቢሆም እንዴ ሐድገቶም ትፈረር ምኖም ዐለት። “ባዞሆም ወነብራሆም እንዴ ሐድግኩ እሉም፡ ረቢ ልዕቀበኩም እንዴ እቤቱ እትፈረር ምኖም ለዐልኮ ወረቢ

ዐቅቡም እዬ፡ እኪት ኢሳደፈተኒ። ዮም ለሕነ ሐለፍነ እበ ሓለት እት አዋልድነ ትደገም ኢሀሌት። ምን ጀሀት ውዛረት ዓፍየት ሐል ጋብእ እለ ሀሌ። መጽንሐ አጀኒት (ሐግነት) ሰበት ሀሌት፡ አጀኒተን እንዴ ሐዝለያሁ መጸኦ እብ ወእት አካነ ሸቅለን ምን ቅሩብ እት ልርእያሁ ለጠቤ እት ወክዱ ለአጠብያሁ ወለጸብራመ ነብራሁ እት ነሰእ ልትረዓ እለን። ምን ሸቅለን እንዴ ኢልትዐጠለ መናበረተን ሳይረ ሀለዩ” ትብ። እት ምህርሆን እግል ልፈድበ ወለሀለ አብካት እግል ልትነፈዕ ምኑ፡ ህተን ለልሐዝያሁ ወውጃድ እለን ለኢሀላመ ኖሰን እት አርድየት ክም ለሀሌ እግል ሊደየ ህዩ ፊናህ ሓለፈት። ለአንሳይት አካነ እግል ትትአመር እለ ወሕሸመት እግል ትርኩብ ገኦት ምንገብእ፡ ሀለዮተ እግል ተአሰብት፡ እግል ትመሀር ወትሸቂ ልትሐዜ ምነ። አማንተ ተርኪዝ ወነወ ለሐዜ። እግል ክሉ በርናምጅ እንዴ አፍገርክ እግል ቲጊስ ሰበት ልትቀደር ህዩ፡ ምን መትጀሃድ ወመትጸጋም ሐር እግል ሊበለ ክም አለበን ትመክር። እግልሚ፡ ዐውቱ ኖሰክ ተአመጸኦ ወእግል ትምጸኦ ኖሰክ ትሸቂ እለ ሐቆ መጽኦት ህዩ ዝበ ምንክ አለብ። ለህበት፡ ፍክር ወተዕበት እንዴ ነሰኦት ትመጽእ ሰበት ሀሌት።



እብ መሕበር ወጠን ሸባብ፡ ወደረሰ ኢልኩ፡ ለሕትዓሌ ሰፍሐት

ልግብ

“ለጀኔታዬ ዕንቼ እግል እክሬ እቱ ተአጅዝ እግልዬ ማሚ” ትቤ ለሓዳስ ወፋርሐት ለዐለት ዋልዳይት፡ እግል ሐኪም እት ትትሰአል። እግል ለጀነ ልፋፍ እቱ ለዐለ ጭቅመት ክም ሐቅፈት፡ ወእግል ለፈት ቅሌዕ እንዴ አበለተ፡ ለኑኡሻይ ገጽ እግል ትርኢ ዕሽምት እት እንተ። ለሐኪም ሻፍግ እት እንቱ እንዴ አቅበለ ዲቡ፡ እበ ሽባክለ ሰኒ ውቁል ላቱ ሆሰፒታት አሰክ ገከደን እት ለአአቀምት፡ “ለጀኔታይ እምበል እዘን ትወለደ” ቤለዩ።

ዘመን ክም ሐልፈ ላቱ፡ ለጀኔታይ ምሽክለት ናይ ሰሜዕ ክም ይዐለት እሉ ተአከደ። ለሮዮን ሌጠ ቱ ለካርብ ዐለ፡ በህለት ክምሰል ምነ ቅርደን ለትቀመመዩ መሰለ ዐለዩ። ሐቱ ምዕል ምን መድረሰት እንዴ ዐቅበሉ፡ እተ ሕቅፍ እሙ ከንተረ ክም ገብኡ፡ እሙ ምን ክሉ ከብደ ኡተንፈሰት። እዲናሁ ሰሰልሰለት ናይ ልቡ ለሰብሮ ተዩልል እግል ትግበእ ክም ቱ ቅዌት ይዐለት እሉ። ህቱ ብዞሕ እግል ለአሰፍ ጋር እንበል ንዩቱ እተ ዶሉ ተረግ እንዴ አበለዩ፡ “ይመ፡ ዎሮት ሕጣን..ዎሮት ዐቢ ሕጣን፡ እንተ ጅግሉብ እት ልብል ትላኪኒ” ቤለዩ። እት ሽንግል ክም ጌሱ፡ መነ አከደለ በክቱ ህቱ ሰኒ ግሩማይ ገብኡ፡ ወእት ቀበትለ መልሂቱ ደረሰ ምን ክሉም ወለዐል ሕሩይ ወፍቱይ ገብኡ፡ ወምን አመረ ረኤሰለ ፈሰል እግል ልግበእመ ቀድር። ምናተ እሊ እግል ልጅሬ ገብኦ ምን ገብኦ፡ ህቱ ፍንቱይ ጋራት እግል ልጠውር ብዲቡ፡ ገሌ ክሉ አዳም ለኢቀድሩ ጋራርት፡ በህለት ፍንቲት መውህበት ናይ አደብ ወሙሲቀት እግል ተህሌ እሉ ብዲቡ። “ምናተ እንተ ምሰለ ብዕዳም ነኦይሽ ላቶም ክምሰሌከ ለመሰሉ እግል ትትሓበር ወትትመሳኒ ወጅበከ” ቲለቱ ዋልዳይቱ እት ተዓትቡ። ምናተ ልበ ላተ እብ ረሕመት ልትጨመም ምነ ዐለ። አቡሁ እግል ጀኔታይ ምሰለ ናይለ ዐይለት ዶክቶር አመሕበረ፡ እግል ኒደዩ ለእንቀድር ጋር ሚ ህለ ገብእ? “ኣነ ክመ መሰለኒ እንዴ ትከለፍኮ ክልኤ እድን ለእረኩብ እበ ገበይ እግል እግሰር ብእትዬ” ትረከበዩ ምን ገብኦ። ቤለ ለሐኪም ቀራር ክም ነሰኡ።

እተ ዶል ለህ ቱ ለዲብ ሓዚ ናይ እሊ እግል እሊ ኑኡሻይ ጀነ ፊደ እንዴ ገብኦ እብ እዘኑ ለልትበረዕ ነፈር ለትበገሰው። እሊ ክምእነ ዲብ እንቱ ሐድ ክልኤ ሰነት ለገብእ ወቅት ክም ሐልፈ፡ “እንተ ወልዬ ዕያደት እግል ቲጊስ ቱ፡ ለእለን ተሐዜ ዐልክ ክልኤ እዘን እበን ለልትበረዕ እግልክ ነፈር ራክበት እግልክ ህሌኮ” ቲለቱ እሙ። አቡሁ ህዬ እብ ጀህቲ፡ “ምናተ እሊ ጋር እሊ መሰጢር ቱ” ቤለ። ለዐመልዩት አክል ሕድ እብ ዐውቲ ሰበት ተመት ሐዲስ ነፈር ትከለቀ። ወለዐልዩ እሉ መውህባት ሰኒ ወአማን ትደቀበዩ፡ ወለ መዳርሰ ወለክልያት ዔማት ለልተራቱ ዐውቲታት ገብኦዩ።

ሐቆ እለ ለጀነ ህደ ወእት ዕላቃት ዲፕሎማሰዩት ትፈረረ። “ምናተ እግል አምር ወጅበኒ” እንዴ ቤሉ፡ እግል አቡሁ ለምሰጢር እግል ለአሰእሉ እት ወራዱ ሸብ ቤለ እሉ። “እሊ ቅያሰ ለአለበ ሰኔት ለወደ እግልዬ ምን ቱ” እት ልብል ምን ሰአል መትከረዕ አቡ፡ “ክሉ ረእሱ እሊ ዕዳዩ እግል እብለሰ እበ እቱ ለእቀድር ክፋዩት ዋዲ እሉ ህሌኮ ኢመሰለኒ” ቤለ። አቡሁ ህዬ “ወእግል ቲዴ እሉመ ክሉ ረአሰከ ሐሊት አለብክለ” እንዴ ቤለዩ፡ “ወላመ እትፋቅዩትነ እንተ እሊ ጋር እሊ እግል ተአምሩ ክም አለብከ ዐለት..አዜዲ አሰክ እለ ለወቅት ለእቱ ተአምረ ማጽእ ዩህለ” ቤለዩ። እሊ ለኢትአመረ መሰጢር ጽልሙታት ሰፍታት ሓጅባቱ ጸንሐዩ፡ ምናተ ግድም ለምዕል አክለት ህሌት.. እት ሐቱ ምነ አሰክ እለ ሳምዳት ለጸንሐዩ ጽልሙታት አምዔላት፡ ህቱ ወአቡሁ መጦር ሕድ እንዴ ገብኦው፡ እት ረአሰለ ጀናዘት እሙ ክራት እቱ ለዐለት ታቦት በዋረው። ለአብ እብ ምልሃሁ ወእብ ረሕመት ዛይደት፡ እዴሁ አሰክለ ጀናዘት እንዴ መደ፡ እግል ሓምል ቡናይ ጨገርለ እም ዶል ቀልዐዩ፡ ለእሲት እዘነ ቁሙም ክም ዐለ ከሸፈ። ከእግለ ጀናሁ እት ለሐሽክሸክ ክምእነ ቤለዩ፡ “እምክ ሰኒ ልውቅት ወሙበሱጠት ዐለት፡ ወእሊ ጭገረ ሐቱመ ምዕል እግል ተሓጭሩ ተሐሰብ ይዐለት፡ ወዎሮትመ እምክ ምን ግርመተ ወጀላለ ገሌ አንቀሰት ህሌት ለመሰለ እቱመ ይዐለ። አማንዬቱ ማሚ?” ቤለዩ።

ለናይ አማን ግርመት እተ ናይ ገሮብ መማኒት ኢኮን ለትትረኩብ፡ ህተ እተ ቀልብ ቱ ለትትረኩብ። ለናይ አማን ድሕረት እተ እብ ዕነ ለእንርእዩ ሰነዕ ኢኮን ለተአተርክዜ ዲብለ እብ ዕነ ለይእንርእዩም ጋራት ተአተንኩብ። ወለናይ አማን ፈተ እተ እሉም ለእንወዴ ወክሉ ለለአምሮም ጋራት ኢኮን ለተአተንኩብ፡ ህተ እተ እሉም ለእንወዴ ወዎሮትመ ለኢለአምሮም ጋራት ተ ለተአተንኩብ።

ጠዓም

ሓፋነት ለእንፈቱ እበ ምስምሰ ሕነ ቀደም እለ እብ ብረድ ቃራም ሰበት ዐልናቱ። ወእግል በርህት ምን ቅያሰ ወለዐል ለነሐምድ እበ ምስምሰ ህዩ ጠምጠምለ እት ዋልመት ለሓለፍናሁ አውቃት አክል ሕድ ሰበት እንፈቅዱ ቱ። ወእተ ክምሰልሁ ለውቀት ወፈርሐት ለእንፈቱ እበ ምስምሰ፡ ሕነ ሐቱ ዶል ሐዘን ወአሰፍ ሚ ክም ጠምዋሙ አክል ሕድ ሰበት ነኦምር ቱ።

አሆታይት ጸብሬ

ቃኑን ፈታነት አውመ ሰሕበት ብዕዳም እት ዐመል ዶል ተአውዕሉ፡ ዎሮት ምነ ሰኒ ወአማን ደቅብ ለለአወጅዱ ፈንያት ሰበት ቱ፡ እቡ እንዴ ትነፈዕከ አሆታይ ነፈር ክም ትገብእ እግል ቲዴ፡ ወአሆታይት ፍገራት እግል ትርኩብ ወእት ደንጎበ እት ሐያትክ ለሐሰት ነቲጀት ክም ትረኩብ እግል ተአአክድ እቡ ለትቀድር ገበይ ቱ።

ጸብሬ ነፍሰክ እግል ተአርዴ ለትወድዩ መትነባይ ለከልቅ

ጋር ቱ፡ ለእለ ትትጸበር አውመ ትታኬ ለህሌከ ጋራት እምበል ከሰሱ፡ ለጋር እሊ እት ሕያትክ አማን ለገብእ እቱ ወቅት እምበል ሸክ ምሰል ካምል ደማን ነፍሰ ጸብሬ ትወዴ እሉ ወአክል ሕድ ልትረኤከ። ወአሰክመ እንተ እለ ጸብሬክ እት ምልክ ዋድህ ህሌከ፡ ክል ዶል ለሐሰት እግል ትተምኔ ወትታኬ ወጅበከ።

ክል ዶል ዐውቱ ታኬ ሐዳይሰ አዳም እግል ሰልፍ ዶልከ ለትዋጅሆም ዶል ትረኩብ፡

በህል እ’ሙራም

መክሲም ጎርኪ (ወድ ሩሰዩ ላቱ ኬትባይ ወዕጹም ሲዩሲ ቱ) ከገሌ ምነ ህቱ ለቤለዩ ሀገጊት ንርኢ

- እግል እደይ ሕኔት ነኦሰኔ፡ እትሰልፍ ለረከሰ እግል ነኦሰኔ ወጅበከ።
- ለእናስ ለሕያይ ክል ዶል ገሌ ጋራት እግል ልርኩብ ትሐት ወለዐል ልብል።
- ዎሮት ኬትባይ ለወቀዩ ለለዐጅቦም ወለለኦትፈክሮም ብዝሓም አንፋር እግል ለህሉ እሉ ለልትሐመድ ኢኮን።
- እለን ለእት ወሪድ ሕንኮከ ጋብኦት ለህለዩ እደይ፡ ፈጅር ህተን ተን ጀላብ ሐትነት ሰላም እግል ሊበላነ አሰክነ ለልትመደደ።
- አማን እግል ሐቱ ጣልዐት ለህሌት ነፍሰ እግል ትሰፈፍ ወትሳሬ ላዝም ሸርዋ ኢኮን።
- ለገብኦ ነፈር ክልመ ምን ዐንደል ክርቡት እለ እዲነ ገርደዓት፡ ከሸንህቱ ዲበ ሰኒ ወአማን ትዛይድ።
- እግል አጀኒት ነኦይሸመ አክል ሕድ ክመ እግል ዐባዩ ለትኮትብ እበ ገበይ እግል ትክተብ እሉም ወጅበከ፡ ምናተ እብለ ሐሰት ደረጀት እግል ልግበእ ብዲቡ።
- ክታር ሓልፈት እት ሐቱመ ኣነን ኢለእበጽሐከ።
- ለእቱ ትትፈረር ሸቅል ጀላብ ምትዐት ገብኦ ምን ገብኦ፡ ለእዲነ ሰኒ ወአማን ትዋዕም፡

- ምናተ ዋጅብ ገብኦ ምን ገብኦ እት ግብርነት ልትበደል።
- ፈልሰፈት ግልብብት ቱ፡ በህለት ለገብኦት ጋራት ሕብዕት ተርጀመት ሰበት ቤ ሕነ አክል ሕድ እግል ንፍህመ ወጅበከ።
 - በዐል ኬር እት ሐቱ ወቅት በዐል ኬር ወግሉል እግል ልግበእ ቀድር፡ ምናተ ሸራር ላተ ምን ቅያሰ ወለዐል ዓቅል እግል ልግበእ ወጅቡ።
 - ብዝሓም ምን ናይ እሊ ዘመነ ኬትባት፡ ምን ከምረት ምነ እሉ ከትቦ ወለዐል ሰቱ።
 - በዐል ኬር ወጸጋይ ወረሒም ግበኦ፡ ወመልሂትክ ፍቱ፡ ወግብኦም አትሓዋር፡ ወእግለ እት ሐቅክ ለትዐረድው ሳሚሕ ወዓፌ።
 - እማት ሌጠ ተን ለእብ ክሱስ ሓራት (ምስተቅበል) እግል ልሕሰበ ቅድረት ለበን፡ እሊ ህዩ ህተን ሰበት ተን ለእትለ ው’ላደን ወልዳህ።
 - ክሉም ለጋራት ቀለላም ዶል ገብኦ፡ ለነፈር እት ሻፍግ ወቅት ግሉል ገብኦ።
 - ሳዐት እትለ እዴከ ጨቀምኳህ ምን ገብኦ፡ ክል ዶል ኒኢሸት ትመሰል፡ ምናተ አደምከ ምነ ምን ገብኦ እተ ዶልከ ህተ ዐባይ ወቃልዩት ክም ተ እግል ትፍህም ቱ።

እሙር ወሰሙይ እግል ትግበእ ክም ቱ ጸብሬ ውዴ። እንተ ሰኒ ዐቢ ወፈዳብ ላቱ ወቀይ እግል ተአውቄ ክምቱ፡ ወለእለ ሳትት ዐልከ ጋራት እግል ትብጸሐ ክም ቱ፡ ወእቡ እንዴ ተዐዴከ እግል ርሕክ ለሐሰት መንበረት እግል ትክለቅ እለ ክም ትቀድር ጸብሬ ውዴ አውመ ታኬ። እንተ ክል ዶል ሰንያም ጋራት እግል ልጅረው ክም ቱ ትትጸበር ወፋል ሰኔት ሌጠ ትታሌ ጋብኦከ ምን ገብኦ፡ እለ ሸንህትከ ወምራድከ ለኢተምም እቶም አውቃት ህለው ምን ገብኦ ሰኒ ሐዳም ቶም። ከክል ዶል አሆታይት ጸብሬ ወፋል ሰኔት ሌጠ ታሌ።

ተርጀመት መሰል

“ለይአግደ ሞኦሻት ኢለሐንፍል ወለትከዐ ማይ ኢለዐቀብል”

አማንተ ማይ ሐቱ ዶል ድሽ እንዴ ቤለ ሐቆ ትከዐ ምንከ እግል ትብለሱ አውመ እንዴ ለቀዋክ ምን ሐዲስ እግል ተአከቡ ለኢልትቀደር ሌጠ እንዴ ኢገብኦ፡ ምነ ምስተሒላት እግል ኒበለን ለእንቀድር ጋራት ገብኦ፡ ከምመሰላይ ሞሻት እግል ትትሐንፈል ገብኦት ምን ገብኦ ለመሐንፍላይ እትሰልፍ እግል ለአግዴ ብዲቡ፡ ወለይአግደ ህዩ ሞሸት እግል ለሐንፍል ለልትቀደር ክም ኢኮን ምሰል እሊ ናይ ማይ ተዩልል እንዴ አትሳነነ አሰኦሌ። ከእንሰር ሞኦሻት እግል ለሐንፍል ላዝም እግል ለአግዴ ብዲቡ ምን ገብኦ፡ እግል ለአግዴ ህዩ ሚ እግል ሊዴ ክም ብእቱ ዋዴሕ ቱ፡ በህለት እግል ልሸቄ ወተሐት ወለዐል እግል ልበል ወእግል ለአፍሬ ለአትሐዝዩ፡ ወእለ ሐቆ ኢትገብእ እብ ምንቅራርከ ለትገብእ ጋራት ክም ይህሌት ለመሰል ተአክድ።

ዝበድ ዛዖታት

ከለዋ ሐቱ ሰፍሐት ናይ እለ እዲና ቱ፡ ምናተ እት ፍንጌነ ለህሌት ዕላቀት ህዩ ክታብ ካምል ቱ። ከእብለ ምስምሰ ጀላብ ሐቱ ሰፍሐት ክታብ ካምል እግል ኢንሰኦን ሕሳብነ ኒዴ።

መዕሉመት

- ክምዩት ናይለ እት ገሮብ ወድ ኣደሚ ልትረኩብ ደም ሐድ ሰስ ልትር ትገብኦ።

ተብሰም

ዎሮት ነፈር እብ ገበዩ እት ገይሱ፡ አዳም የም አለቡ አሰር ሕድ ሪገት ባዋር

እት እንቱ ረኡ። ህቱመ ለገበዩ ሸክፈ ምነ ወእተ ሪገት አሰርለ አዳም ኣነኑ ጸብጤ። ሐር እግለ ቀደሚሁ ለዐለ ነፈር፡ “መልህይ እለ ሪገት እለ ናይ ሚተ?” እት ልብል ተሰእለዩ። ህቱ ህዩ፡ ወላሂ እለ ዳሊ ህሌኮ አለቡ፡ ለአዳም ሰፍ ጋብኦ ምን ረኤክም ቱ ለእበዋር እተ ህሌኮ ቤለዩ። ህቱ ህዩ እንዴ አድመ ምኑ ከለቀደሚሁ ዐለ ነፈር ትሰእሉ፡ ለህይመ ነፍሱ ለበለሰ ሀበዩ። እብላሁ ዶል ከዎሮት እት ልትሰኡል አሰክለ እት ሰልፍለ ሪገት ለዐለ ነፈር በጽሐ ወእግሉመ ዶል ትሰእለዩ፡ ህቱ ህዩ፡ “ኣነ እለ መዕጽዩትዬ እግል እሰደድ እንዴ እቤ ዶል በጠርኩ፡ ክሉ ለአዳም አሰርዬ ሪገት ጸብጤ ቤለዩ። ህቱ ህዩ፡ ከእለ ምን ገብኦ ለመዕጽዩትከ ኣሰረ ምን ህሌከ አፎ ኢትገይሰ እግልከ ዶል ቤለዩ፡ ህቱ ህዩ ከኣነ ምዶል ግሉል ገብኦከ ከእለ ሪገትዬ ቀደም ክሉ ለአዳም እት እንተ እንዴ ሐድግክወ እገይሰ” ቤለዩ።



ምን ውራቅ በሐሰ እግል ዐቦት ትግራይት

4^ይ ክፈል

አክትቦት ትግራይት

1. ዲብ ሰነት 1894 ለትኩተብ ክታብ ቀዋዕድ ትግራይት ኢጣሊ ወኪላሊ ትግራይት-መ ኦሮ ምነ ገዳይም አክትቦት ትግራይትቱ፤ እሊ ክታብ እሊ ለትፈናታ ከሊማት ወመዓኒ ትግራይት ክቱብ እቱ ምንመ ህለ ለህቱ ክቱብ እቡ ህለ ሕሩፍ ላቲንቱ፤ ምነ ዲብ ክታብ ለህለ ከሊማት ሰሩ የም ለበደ አው ንትነፊዕ እቡ ለይህሉን ወሰሩመ ናይ ብዕድ ሂጋ ሰበት መሰል ዲብነ ለነአመሸሽ ምኑቱ፤

እግል መሰል፦

- ንጉሱ፤
- ንግሰቲ፤
- ንግደት፤
- ፈላሳ፤
- ፈላሳት ወለመሰሉ ህለ፤

2. አምበል እሊ ዲብ ሰነት 1897 እብ ኢኖ ሊትማን እብ ሰበት ቀዋዕድ ትግራይት ለትኩተብ ወእብ ህግያ ጀርመን ለትፈሰረ ክታብ ቀዋዕድ-መ ህለ፤ እሊ ክታብ እሊ ከሊማት ትግራይት

ምሰል ዐረቢ፤ አምሐርኛ ወዕብርኖት ከአፎ ክምሰል ልትቃረብ ወልትቃረን ሸሬሕ፤ ለክታብ እብ ጀርመን ወላማ ህለ እቱ ተውዴሕ እብ ጀርመን ሰበት ቱ ዲብ ፈሀዋቱ መታክል ከልቅ፤ ምናታ እግል ትግራይት ላታ ዐቢ ርዝቅ ክምሰልቱ ሸክ አለቡ፤ ምን እሊ ዲብ ዘመን ቅዱም ለትኩተብ አክትቦት እንዴ ረኡን የም ትግራይት ዲብ ምህሮ አካዳምየት ኢጉብእ ምንገብእ፤ እብ ክሱሰ ዲብለ ገብእ በሐሰ ወድራሳት ላታ ገጽ ግረ አቅበለት እግል ኒበል እንቀድር፤

3. ለዲብ ሰነት 1901 እብ Conti Rosini Carlo እብ ክሱሰ ሞላድ ማርየ ወመንሰዕ ለለሓኔ ወዝያደ ዲብ ዓዳት መንሰዕ ለረክዝ ክታብ ዲብ ሮማ ኢጣልየ ጠበቅ፤ ዲብ እሊ ክታብ እሊ ለህሌት ትግራይት ነዲፊት ወናይ አሰል ክምተ ትትአመር፤ ሰሩ ለዲብ ወቀት ለሀይ ለዐለ ከሊማት መዓኒሁ አምራም ወዐባዩ እንዴ ትሰአልከ ኢረከብኩህ ምንገብእ እግል ተአምሩ ሰዱድቱ፤ አው እትሊ ወቀት እሊ ዲብ በዴ ገይሰ ምንመ ህለ አማራም ወዐባዩ

እንዴ ትሰአልከ እግል ልትረከብ ቀድር፤ ለካልኣይ ክታብ ዲብ ሰነት 1903 እብ ሕሩፍ ግእዝ ወሂጋ ትግራ ለትኩተብ ክታብ ዶል እንረኡ፤ እሊ ክታብ እሊ እብ ሰበት ታሪክ፤ ዓዳት ወአድጋማት ቤንዓምር ወእብ ፍንቱይ ናይለ ዲብ ሕዱድ ሱዳን ወኤርትሮየ ለኩበር ቀባይል ሰብደራት ወልገዴን ለሓኒ፤ እሊ ክታብ እሊ እብ Conti Roosini Carlo ለትኩተብ ወዲብ ሰነት 1903 ዲብ አሰመረ ለጠበቅ፤

4. ክታብ አድጋማት ትግራይት፦ እሊ ክታብ እሊ እት ሰነት 1910 ዲብ ሊድን ሆላንደ ለጠበቀ እትገብእ፤ እት 285 ለትኩተብ 117 ለትፈናታ አድጋማት ወሐካኪቶ፤ ቅሰሴ፤ ዓዳት ወሰዋልፍ ገቢል ትግራ ለሸሬሕ መዋዴዕ፤ አሰማይ አዳም ወንዋይ፤ ገባይል ትግራ ወአሳሰ፤ አሰማይ ከዋክብ ወመድሐር ሰርቅ ወሬሕ፤ ዐለቦት አወረሐት

ወፈጋይር፤ አሰማይ ወአጅናሰ አሰይፍ፤ አውታር መሰንቆ አሰረዓት ወሰቅራት፤ ግም ወአሰማይ ንዋይ (ሓ ወእንሰ)፤ ክምሰልሁመ መራግም፤ ሰሩር ወብዕድ ለሸምል እት ገብእ፤ እሊ ክሉ ዲብ ሂጋ እንግሊዝ ለተርጀማቱ፤ እሊ ህዩ እግል ኖሱ ኦሮ ምነ ምን ግም ዲብ ግም እግል ልትሓላለፍ ለቅድር ክብት ትግራይት ቱ፤ (ENNO LITTMANN, VOLUME II 1910 LEYDEN)

5. ላካልኣይ ዲብ በራምጅ ክርን ገቢል ለትነፈዐን ምኑ ለዲብ ሰነት 1913 ለጠበቀ ክታብ ሐይለት ትግራይት ቱ፤ እሊ ክታብ እሊማ መንታይ ናይለ አወላይ ክታብ እትገብእ፤ ለቀደም አምእት ሰኢን እብ ሸዐብ ትግራ ልትሐሌ ለዐለ ሐይለት ለለአወርስ ክታብቱ፤ምን 8 ገባይሎታት ወበናቢን ዐዶታት እብ ዝያድ 200 ሐልየት ለተሐለ እትገብእ፤ እግል ትፈናታ

ተጋቢብ ለሸሬሕቱ፤ ብዝሐኒ ናይለ እትሊ ክታብ እሊ ለህለ ሐይለት 717 ሕላየት ቱ፤ እሊ ሐይለት እሊ ዲብ 530 ገጽ ለትኩተብ እትገብእ፤ ጽብጡ እብ ክሱሰ ድመል፤ ግብእ፤ ግርመት፤ ሐምዴ ፡ ሕማት፤ ጠቢዐት፤ ተሊለት፤ ኤነኒብ፤ አትካላፍ፤ ወለመሰሉ ሸሬሕ፤ (ENNO LITTMANN, VOLUME III LEYDEN 1913)

ምን ክሉ ለለትዐጅብ ላኪን ፈን ለእሊ አክትቦት እሊ ክቱብ እቡቱ፤ የምክ ምሰል እሊ አዜ ባጽሓሙ ወኪትብት ለልትነፈዶ እቡ ዐገል ለጠወረ ዐለ እግል ልትበሀል ቀድር፤ ለዲቡ ህለ ሐይለት ናይ እሱው ገቢልቱ፤ ወለሕላየት ለሐለ ኖሱ ምንቱ፤ ለልትነፈዕ እቡ ዘያታት ሚቱ፤ ለሕላየት ዕልብ ከም ወእት ገጽ ከም ህሊት፤ እብ ሚ ሰቡብ ተሐሊት፤ ክሉ እሊ ዋዴሕ ዲብ እንቱ ዲብ ክታብ ህለ ወእግል ዲመ እግል ልትለመድ ለቡ ዐገል ክቱብቱ፤

መቃበለት ርኢሰ ኢሰያሰ አፍወርቂ . . .

ምን ገጽ 5 ለተላለ

ሰኣል፤ ሓይሰ ርኢሰ፤ ወሰክ ማህየት ምሰል ተቅደር ዕምለት እት ሱግ ወመንበረት ለአምጸአየ ረሀየት ህሌት፤ አሮት ምነ ጸር መንበረት እክቡድ ለህለ ላኪን መሰላለት አብያት-ሰከን ተ፤ እሊ አግደ መሕዝዝ እግል ልርሄ እት ኩሉ እንክራት ዐድነ ለልትመደድ ወጠለብ ኩሉ ከፈፍል ለልአተምም በራምጅ ልትኤተን ከም ሀሌ፤ ቀደም እሊ ሸርሕ ዐለ፤ እት ሰነት የም ዓመት እት ፍዕል ለልተርጀም ምኑ ላብት በራምጅ ሚ ሀለ?

በሊሴ፤ እሊመ ሐድ ለአለቡ አርእስ ገናድ ቱ፤ ቀደም እላመ ምነ ኢትዐወትን እቱ በራምጅ እንዴ እቤ ለሸርሐክወ፤ ብንዮት አብያት ሰከን ቱ፤ ጅንሰ መንበረት አዳም ቀየርት፤ የምክን እሰዉ በድር ወእሰዉ ልትደንገር ለትብል እቱ ኢኮን፤ አሰረቶት ሰፍረ ሰልፋይ እግል ትንሰኡ ለቀ'ላ ቱ፤ ህቱ በይኑ ካሬ ኢኮን፤ እግሉ ለሳንድመ ሀለ፤

ቤት ሰከን ሐቀመ አለብኩ፤ ለእለ ረኩበክ ማህየት አው እተይ ርኩብ፤ መንበረትክ እት ተኣኪ ተ ለትገይሰ፤ ኩሎም ለአግደ ለልትሐዘው ሓጃት፤ ሴንደት ሕድ ቶም፤ “ኢፋሉ፤ ነብረ ሰበት ትብድር፤ እሰልፍ እግል ነአዋፊሕ፤ ሐቆህ ናይ ልባሰ፤ ደርቡ ናይ አብያት እግል ኒዴ ቱ” እግል ቲበል ከትእዘም ምኑ ኢትቀድር፤ አብያት-ሰከን ምኑ መቀየሲ መዋዋኒን ሰበት ቱ፤ ምነ አግደ ሐል ለልአትሐዝየም ጋራት ወመሕዝዝ ሰበት ቱ፤ እግሉ እግል ንባልሐ ብነ እንዴ ትብህለ ለኢትወጠነ አምር የዐለ፤

ናይ ፕሪካስት (ሰፍነግ) መሻቀዶታት ጀረብኩ፤ መሰነዕ እሰመንቲ ውበዕድ አላት ብነ እግል ነኦታምም ትጀሀድነ፤ አብያት ለሸቅየ ኩባንያታት አቂምኩ፤ አሰክ ናይ ካርጅ መአሰሳትመ አምጸእኩ፤ ኩርዩን እት አሰመረ ወባጼሕ አብያት ሸቀው፤ እሊ ምሰል ቅድየት አብያት ሰከን

ለትአንበተ፤ ብዕድ መሳኔዕ ወመጃላት እንዴ ይእንጠውር ለትአንበተ ዐለ፤ እግል ክል መዋዋን ከአፎ ቤት እንወጅድ እሉ ምነ ልብል ፍክር ለትበገሰ ዐለ፤


እት ንሕሰ ልንበር፤ እት አልቦ፤ እት ቱክሊብ እበ ኢከሰሰ፤ ከም ምን መዋዋኒን ናየም ቤት መልት? መጽሀይ ለባም መዋዋኒን አክል አየም ቶም? እት መዳይን፤ ሹብህ መዳይን ውበሩር ከአፎ ሀለ? እብ ህምገም ‘እትለ ጤሰ ሰበት ብኩ፤ እንሰር ሸለት ሸቁ፤ እትለ ድካን’ ኢኮን እግል ቲበል ለብኩ፤ እብ አማን ቤት ሰከን ዶል ልትበሀል፤ ዐነድር ሸቃቅ፤ ከዋ ማይ፤ ከህረበት፤ ጽርግዩ ሱግ እት ሰምጠ ለህለ፤ ክዳማት መዳርስ ወዓፍየት እት ባክ ለቤ በሀለት ጀማዕ ናይ ለትፈናተ ክዳማት ሰበት ገብእት፤ መዋመጦሩመ ሱዉይ መትመዳድ ለቡ ጀላብ እግል ልግበእ፤ ለናይ መናበረትመ እብ መርሐለት መርሐለቱ እግል ንባልሐ ብኩ፤ እብ ዓመት ላኪን፤ አብያት ዋወር ወዐባዩ፤ ኩሉ ክዳማት ከህረበት፤ ማይ፤ ጽርግዩ ወሐ'ማማት ክጡዋ ለቡ እግል ልብእ ቡ፤ እትሊ ወክድ ጎነ “ተሼዕ ከሚሰ” ልትበሀል ለህለ ሰር-ሰር አብያት ዐደድ አለቡ፤ እግል ሚ? ለመሻክሉ ብዘሕ ቱ፤ እብ ሐትሐቱ እግል ንትሃኔ እቱ እንቀድር፤ አላት ብነ እት አፍረየት እብ ቅድረት ኖሰነ ሚ ነአፈሬ ህሌን? ባባት ወሸባቢክ እብ ናይ ከርስ መቅደረትን እንሸቁ ማሚ? በላዋ ምድር ወጽኔዕ አው ብነእ ቤት ሚ እንሸቁ? ብዕድ ለትፈናተ ምሰል ብነ ለገይሰ ለኢትሸቀ አላት፤ ምን ካርጅ ልግበእ ወእንሰር ለእንረክቦም ሚ ብኩ? እሊታት እብ ሸባህ-ሸባህ እት ልትሓየሰ እግል ሊጊሰ ቡ፤ የም ዓመት 10 ምእታይት ህሌክ ምን ገብእ፤ ሰነት ሓረት አሰክ 20-30 ምእታይት ትሄርር፤ ሐቆህ እበ ስታትክ “ሚ ነቅሶት ምንዩ” እት ትብል ዲብ ተኦታምም ትገይሰ፤ አዜ ለመታክል ቀለል ይንብሉ፤ ክምለ ሐሰብናሁ ኢትሰርገልነ ዲቡ፤

ምን ሰነት 2018 አሰክ አዜ፤ ሚ ቱ ለሳድፍ ህለ መታክል? ናይ አላት፤ ናይ ማሸኔሬ፤ መቅደረት አዳም ምን ተሐገለት ቱ፤ ሚ ታ ለምሽክለት? እሊ ለከሰሰ ታያን ሀሌ፤ ሱረት እግል ለሀበነ ቀድር እንብል፤ ክምለ ሐሰብናሁ ኢትሰርገልነ እቱ እንብል እት ህሌናመ፤ ለመሻክል አዜ እሊሉያሙ ህሌነ፤ እግል ንባልሐም እንጀርብ ህሌነ፤ እግሉ እት ወግም እንዴ አቱነ፤ እግል ምሽክለት አብያት ሰከን እብ መርሐለት መርሐለተ እት ኩላ ደውለት እግል ንባልሐ ብኩ፤ እግል በዝሐ ሸዐብ ለገብእ አብያት እግል ለህሌ ቡ፤ “ፋኦድ ሚ ተ?” ሐቆመ ትብህሉ፤ እት አፍረየት ወአክእላል ርዝቅ ፋንጎሕ እት ድህር ደረጃቱ ህለ ምን ገብእ፤ እት መንበረት ሌጠ እንዴ ኢጉብእ፤ አሰክመ ዲብ አደቃብ እቅትሳድ ለትህሌ እሉ ተረት ሕድድት ትገብእ፤ ሰበት እሊ ቤት ዶል ተህሌ እግልኩ፤ አፍረየትክ ወክድመትክ እተ እቅትሳድ ሰበት ተኦደቅቡ ሕድ ለሳንድ መናፌዕ ሰበት ቡ፤ እለ ቅድየት እለ እግል ተአምሸሽ ምነ አለብኩ፤ ለዐለ እግልነ መሳኔዕ አውመ መሸቀዩ ናይ ለትፈናተ አላት ብነእ እትሊ ወክድ ጎነ እሰነያሙ ህሌነ እግል ኒበል እንቀድር፤ አሮት ምነ ኢአሰኔናሁ፤ ሸኡን እዳረት ውበቅዕት መቅደረት አዳም ቱ፤ እት አላት ብነ ምሽክለት ብነ እግል ኒበል ይእንቀድር፤ መሰነዕ እሰመንቲ ህለ እግልነ፤ መሰነዕ እሰመንቲ ገደም፤ ካሬ ለልአሸቁ መሳድር ቡ፤ ምናተ ከህረበት ክል-ዶል እት ትቀሰን ሐቆመ ሸቀል ከልአቱ፤ እሰመንቲ እግል ልትሸቁ ኢቀድር፤ ገሌታይ እሰመንቲ ምን ካርጅ እት ንትዛቤ ነአመጽእ ህሌነ፤ ክምሰሌሁ እት እንወዴ ምን ነኦተላሌ ለአረበሐኒ ገብእ? ክም ምራድነ ለትፈናተ ብነእ እግል ንሸቁ እቡ ለእንቀድር ሐጸ ብኩ፤ እበን ህለ እግልነ፤ ናይ ሕጽሕጽ ውበዕድ እሉ መሰል አላት ብነ እግል ንወጅድመ ምሽክለት አለብኩ፤

ምን አምሳላት ትግራይት

- እንዴ ሰርቅ ልርእዉ እንዴ ወሰክ ኢልአሙኑ፦ ሐቱ ዶል ሰሜትክ ሐቆ አኪት አው አኪይ ውዳይ ሐቆ ወዴክ ካልእ ዶል ምን-መ ተአሰኔ አዳም ክምሰል ኢልአምነክ እግል ትሸረሕ ለትትመሰል መሰል ተ፤
- ነብረ ተሐልፍ ወዴበ ተርፍ፦ እሊ መሰል እሊ እግል ነብረ እንዴ ትቤ ሐዋኒት እግል ትውዴ ክምሰል አለብክ እግል ትሸረሕ ለትትመሰል መሰል ተ፤
- ማይ ኢትወዴ ሞላድ ተአበዴ፦ ሕኔት እግል ርሕክ ሌጠ ሕፍሰት ወሰኔት ትውዴ፤ እንዴ አቅጠንክ ወባሰርክ ብዕዳም እግል ትፍቀድ ክምሰል ብክ እግል ትሸረሕ ትትመሰል፤
- ቀልብ ከልብ ቱ፦ እሊ መሰል እሊ ቀልብክ ለረአየ እክ ሓጀት ክምሰል ኢተአቀብል ምኑ፤ ወአዳም እብ ብዕደት ዕን ምንመ ልርእየ እንተ ክም ሰኔት እንዴ ርኤካህ ክም ኢትትከረዕ ምነ ለትሸርሕ ተ፤
- አክል ዕቃል ኢገይሱ፤ አክል ሕሳል ገይሱ፦ ለገብአት ሓጀት ምን ቀዳምክ እግል ቲደየ ክምሰል ወጅብ፤ ሐቆ ሀመልካህ፤ ሰደ ክምሰል ሰረት ዝያድ ክምሰል ትደቀብ ዲብክ ተሐብር፤
- አሰበረ ማይ ጨረ፦ በዐል ሰብር እኪት ክምሰል ተሐልፋ፤ በዐል አከይ- ሰብርህዩ ዲብ ብቀት ክምሰል ልትከሬ ተአፍህም፤
- ኢሐረ ሐሪር ኢሉብሱ፦ እሊ መሰል እሊ መንበረት እድንየ መራር ክምሰል ተ፤ መታክል እንዴ ኢትዐዴክ ህዩ ረሀየት ክምሰል ኢትረከብ ተዐብክ ምን ገብእ እት ደንገበ ዐውቱ ክምሰል ህሌት እግል ትሸረሕ ትትመሰል፤
- ከልብ ለንብሐቱ ፈርሀት ዲብ አርወሐ፦ እሊ መሰል እሊ ለገብእ ነፈር ዲብ አርወሐቱ ክምሰል ፈርሀ ትሸርሕ፤ ምር ነፈር ለእግለ ወዴ ህለ እግል መንፈዐቱ ወድየ ህለ እግል ቲበል ዶል ተሐዘ ስትመሰል፤
- ህግዩ እብ መሰል ወገበይ እብ ሰለል፦ ለገብአት ሓጀት በሰር ህለ እግል፤ ህግዩክ እምበል ዐገል በለሰካህ ምን ገብእ ኢትዋዕም ወልትከበተ አለቡ፤ ገበይ-መ ህዩ እብ ተቃርብ ትቀርብ፤ እብ በሰር ንሸቁ እግል ቲበል ዶል ተሐዘ ለትትመሰል መሰል ተ፤
- ክል-ምርት ከቀሣሁ ሐንቱ ሸፈቱ፦ እሊ መሰል እሊ ምርት ነፈር ምሽክለቱ ትኩብድ ዲቡ ትገብእ፤ ምናተ ለገብእ ነፈር ቀሣሁ ሰበት ሰትር ምን ምሽክልክ ለትኩብድ-መ እግል ተህሌ ሰበት ትቀድር ኢትትሻቀል እግል ቲበል ዶል ተሐዘ ለትትመሰል መሰል ተ፤
- ይአምር ጽልመት አምዕል፦ ጽልመት እግል ትርኤ ዲብ ኢትቀድር፤ ለኢልአምር ህዩ እብ አየ ክምሰል ገይሰ ሰበት ኢፈርግ ክምሰል ዲብ ጽልመት ልሄርር ለህለ ቱ፤ መሰለን ለኢቀርእ እንዴ ልርኤ ሕሩፋት ሰበት ኢፈርግ እት ጽልመት ህለ በሀለት ቱ፤ ዕልም በርሀት ሰበት ቱ ተዐለሞ፤ ወይአምር ህዩ ጽልመት ሰበት ቱ ትባልሐ ምኑ እግል ቲበል ለትትመሰል መሰል ተ፤

ዴማት ክታብ እፈ



እት ዱር ሩዋንዳ 2020፡ ኤሪትሮፕ ሕጻል ሚርሒት እግል አስታና ሰለመቱ

እብ እድንያይ መሕበር ዐጀላት ናይ 2.1 ደረጃት ቅያስ ለቡ ዱር ሩዋንዳ ማሌ ለሀ 24 ፌብሩዋሪ 2020 ምን መዳኒት ኪጋሊ እንዴ ትበገሰ እት ሁዩ ለተመ ናይ 120.5 ኩሎ ምትር ናይ ካልኣይት መርሐለት ጅግራሁ አተላለ።

እትሊ ማሌ ለሀ 79 መትጃግረት ዐጀላት እት አካን ምብጋስ ለሐድረው ዲቡ ጅግረ፡ መትባድረት አስክ 63 ኪሎ ሜትር እብ ሰጋይድ ታኪ እት ልትጀረቦ ቱ ለሄረረው። ክም ፍገሪቱ ህዩ መጃሚዕ ብዝሓት እግል ልትከለቀ ወልትሓበረ ቀድረዩ።

እት ነሳፊት 27 ኪሎምትር ናይ እሊ ጅግረ ህዩ፡ ሲራክ ተሰፎም ለብእቶም 10 መትባድረት ለአሰሰወ መጅሙዐት፡ እግል ኪሎሜትራት ሐድ ክም ጌሰት፡ በሀለት እት 33 ኪሎምትር፡ መጅሙዐት ዐባይ ምን ግረ እንዴ ዐሬተ እት ቀበተ ለሐቀት እግል ንህደግ እንቀድር። እሊ መጅሙዐት ዐባይ እብ ምልሃዩ

ለመጅሙዐት ለዐባይ ክምለ ምን ሰካብ ለትነፈዘት እት መሰል፡ ሸፋገተ አዜደት። ምናተ ዳዊት ለዐለ እት መጅሙዐት እብ እግል ተዐሬ አስክ 100 ኪሎምትር እግል ትሄርር ዐለ እሊ።

እብ ፈሪቅ ዳይረክት ኤንርጂ ትትዋሌ ለዐለት መጅሙዐት ዐባይ እግል ቀደሚህ ትትፊተት ለዐለት መጅሙዐት እንዴ ወሐጠት፡ እብ ሕበር ሄራረ አስክ ሾላታ ወዴቱ።

አክራቱ ህዩ፡ እተ ሾላተ ወድ አቶብዩ ላቱ መትጃግራይ ፈሪቅ ኒፖ ዴልኮ ክንፊ ሃይሌሚካኤል፡ እብ 3:03:21 ተዐወተ። ወድ ኩሎምብዩ መትባድራይ ዐጀላት ምን ፈሪቅ አንድረይፍ-ጅናታን 2ይ ፈግር እት ሀሉ፡ ኤርትራ መትባድራይ ፈሪቅ ኒፖ ዴልኮ ቢንያም ግርማይ 3ይ ፈግረ። ወድ ሩዋንዳ ዲደር ራብዓይ እት ልትዐወት፡ ነፈር ሕሩይ ፈሪቅ ዐጀላት ኤሪትሮፕ ሲራክ ተሰፎም ሓምሳይ፡ መትባድራይ ፈሪቅ



እት ትሄርር፡ እት 35 ኪሎምትር ዳዊት የማኔ ለብዲበ ውላድ ሩዋንዳ መትጃግረት ከረ ሰንጊመ፡ ማኒዛቦ ወመጉሻ፡ ክምሰልሁመ ወድ አቶብዩ አብረሃ ለክምከመት መጅሙዐት ህጃም እንዴ ወዴት እግል ትምረሕ ወጠት።

መጅሙዐት ዐባይ ህዩ ምን አተቃባል ወኪን ለትወድዩ ሰበት ይዐለ እሊ፡ እት ፍንጌህ ለዐለት ነሳፊት ዲብ ትርሕብ መጽአት። አስክ ናይ 3 ደቂቀት ወ33 ካልኢት ነሳፊት ሰበት ተሐደገት ህዩ፡ ለሚርሒይት መጅሙዐት፡ ቀደሚህ ለዐለ ሰጋይድ ወጅግረ ንቃዋ ሾላተ እግል ትክሰቡ ቀድረት።

ሰበት እሊ ዳዊት እት ረአስ ንቃጡ፡ እት ሰጋይትመ ንቃዋ ሰጀለ። እት 80 ኪሎምትር ነሳፊት፡

ባይክ ኤይድ መክሰብ ደበሳይ ሳድሳይ፡ መትባድራይ ሕሩይ ፈሪቅ ዐጀላት ኤሪትሮፕ ናትናኤል ተሰፋጼን ሳብዓይ፡ ምን ፈሪቅ ቶታል ዳይረክት ኤንርጂ ሮማይን ካርዲስ ሳምናይ፡ ወድ ሩዋንዳ ዮሴፍ አሩርየ ታሰዓይ፡ ምን ፈሪቅ ትሬንጋኑ ኤርትራ መትክል እዮብ 10ይ ፈግረ።

ዲብለ ናይ ማሌ ለሀ ጅግረ እምበለ 13 ካልኢት ለትደንገረ ከአተ መሓሪ ተወልዱ፡ ኩሎም ኤሪትሮፕ መትባድረት ወቅት ኢከሰረው።

እተ ናይ ማሌ-ለሃ ቀዳሚት እት መዳኒት ኪጋሊ ወድዋራተ ጋብእ ለዐለ ናይ 114.4 ኪሎምትር ብድረ ዐጀላት ለትዐወተ ወድ ካዝኪስታን ፊደሮቭ፡ እትሊ ናይ ማሌ-ለሀ ናይ ካልኣይት መርሐት



ጅግረ ወክድ ሰበት ኢከሰረ፡ ናይ ሰልፋይ ደረጃት ሚርሒቱ ሐፋዝ ዲበ ሀለ።

እሊ ሰጋይድ ብዙሕ ለዐለ እቱ ጅግረ፡ አስክ ከዋ ነሃየት ለትኡቴ 500 ምትር ለሪመ ሰጋይት ታክየት ወናይ 16 ምእታይት ተካየት (Gradient) እት አወላይ ለፈግረ ወድ ካዝኪስታን ደርቡ 2ይ ለአተ ሄኖክ ምሉእብርሃን ቱ። ሳልሳይ ህዩ ምን ፈሪቅ ኒፖ ዴልኮ ኤርትራ ቢንያም ግርማይ ሳልሳይም እት ፈግር፡ ምን ፈሪቅ ዐጀላት ኤሪትሮፕ ናትናኤል ተሰፋጼን ህዩ ሳብዓይ እንዴ ፈግረ፡ እት ሰልፋይም 10 ርቱብ እት እንቱ ቱ ዲበ ናይ ማሌ ለሀ መርሐለት ለትዐደ።

እብ ዓመት እት ክልኢተን እለን መራሕል ወድ ካዝኪስታን ፊደሮቭ መሬሕ እት ሀሉ፡ እብ 15 ካልኢት ደርቡ 2ይ ለሀለ ሄኖክ ምሉእብርሃን ቱ። ቢንያም ግርማይ ሳልሳይ፡ ናትናኤል ሳድስ ወመክሰብ ደበሳይ 10ይ ተርቲብ።

እት ናይ ሰጋይት ፊደሮቭ እብ 12 ንቅጠት መሬሕ እት ሀሉ፡ ዳዊት የማኔ እብ 5 ንቅጠት ራብዓይ ሀለ። እብ ናይ ንቃዋመ ፊደሮቭ እብ ሰማን ንቅጠት ሰልፋይ እት ገብእ፡ ደርቡ ሰማን ንቅጠት ለሰጀለ ዳዊት የማኔ እብ ናይ ምዕል ፈርግ ካልኣዩ ሀለ።

ጅግረ ኮበሪት እግር፡ ፍንጌ ፈረቅ ገዳይም

እት ክል ሰነት ለገብእ ጅግራታት ኮበሪት እግር ፍንጌ ፍረቅ ገዳይም፡ እት ሐልፈተነ ሰንበት ንኢሽ እት ሚዳን ካምፖ-ቺፔሮ ትሉሉይ አምሱ። እሰልፍ ለተልሀው ፍረቅ ኤልፓ ወአዱሊስ ገብእ እት ህለው፡ አዱሊስ እግል ኤልፓ 2-0 ቀልበዎም።

እት ትልህዩ አዱሊስ እሰፍል እት 12ይት ደቂቀት እብ ረክበወ ደርቡት ጀዜ ሳምሶም መጎስ (አጂያ) እብ ሰጀለዩ ጎል ቶም እግል ዕርፍ 1-0 እብ ሚርሒት ለፈግረው። ሐቆ ዕርፍ መተልህየት ኤልፓ ህጃማት ድቁብ ምንመ ወደው፡ ከዋ ድፊሶ አዱሊስ እግል ልትዐደዉ ላቱ ኢደቅበው።

እብ ድዱ አዱሊስ ቶም ለከሰበው፡ ሳምሶን መጎስ እብ ደግመዩ ጎል ህዩ 2-0 አዱሊስ ተዐወተት። እትለ ትልህዩ ፈሪቅ አዱሊስ እብ መዳፍዳዩ ላቱ ርእሶም ገብሬመስቀል (ራሰ)፡ እብ መካፍለት ሐድሽ ተወልዱ (ቀሽ) ወሄኖክ ገብሬመድህን፡ ክምሰልሁመ መሃጅም ሳምሶም ሞጎስ ሐረከት ሰኔት አርአው።



እት ተፋሲል መትባድራይ ሻብ ሕሩይ ሄኖክ ምሉእብርሃን እግል ፊደሮቭ እንዴ ተለ ካልኣይ እት ለሀሉ፡ ለሐሰ መትጃግራይ ዐጀለት ሻብ አፍሪቀ እንዴ ትበህላመ እግል ካልእ ሰነቱ ማሌ እት መሰረሕ (ፖድየም) ዓርግ ሀለ።

እብ ፈሪቅ ዶል እንረኤ፡ ሺኖ-አስታና ምን ኤሪትሮፕ ሕጻል

ሚርሒት ትትአልበዋ እት ህሉት፡ ኤሪትሮፕ ህዩ ካልኣይተ እንዴ ገብአት እት ሳልሳይት መርሐለት ዕዲት ህሉት።

ጅግረ ሩዋንዳ ሳልሳይት መርሐለቱ፡ ዮም ምን ሁዩ እንዴ ትበገሰት እት ሩሰዚ ለትአተምም ናይ 142 ኪሎምትር ነሳፊት እግል ተሀሌ እግላ ቱ።

ሐቀህ ሚዳን ለአተው ፈሪቅ ቺፖሊኒ ወሚሎቲ ዐለው። እት ፍንጌህም ጅግረ ድቅብት እግል ትትረኤ መስኢት ምንመ ዐለ፡ ለትልህዩ ላኪን ምን ጽባብሐ ብርድት ዐለት። መተልህያይ ፈሪቅ ቺፖሊኒ ሃብቶም ክብረኣብ እብ ክልኡት ከርት ቤፌ ምን ሚዳን ክም ትጠረዜ፡ አወላይ ሾት ትልህዩ እምበል ጎል 0-0 ፈግረው።

ሐቆ ዕርፍ ፈሪቅ ሚሎቲ እንዴ ሐሰስ ትልህዩ ሐን መራቀብቱ አተዩ።

እብ ዮናስ ምሕረትኣብ (ፋፋ) እት 47 ደቂቀት ህዩ ጎል ሰጀለው። እብ ጋማም መተልሂት ልተልሄ ለዐለ ፈሪቅ ቺፖሊኒ ጎሎ እግል ልብለስ ሐድ ሕኒቅ ኢቤሉ፡ ላኪን ኢትሰርገ። እብ ሐዲስ መተልህያይ ሚሎቲ ዮናስ ምሕረትኣብ (ፋፋ) ምን ረዩም ለትነድኡት እቱ ኮበሪት ምን ሰር-ሚዳን እብ ሸፋገት ውልዋል እንዴ ትገምብ እብ ለልትሐመድ ጎል ሰበት ደግመ፡ ትልህዩ ሚሎቲ 2-0 ቺፖሊኒ ተመት።



ከርፈ አንበጣጣ፣ እት ሲዋሐል ኤረትሮ?



አሰይድ ዕጁል ዐሊ

አንበጣ ምን ምን አግደ ባልዲን ብቅል ላቶም ሐሽራት ተ። እሊ ባልዲን እሊ፣ እት እክል፣ ሰዐር ወዕጪይ መደረት ዐባይ ለልአጀሬ፣ ወእብ ዐቢሁ ምድር ለህቱ ወርሩ፣ ደማነት ነብረ ንዋይ ወአዳም ለሐግል። አንበጣ እብ መላዩን ለልትፋሬ ወእብ ዕሽል ለልትሐረክ ሐሽራት ተ። ምን ድወል እት ድወል እንዴ በርር ህዩ ልትጋዐዘ።

እትሊ ወክድ ጎነ ምን ድወል ግዋሬ፣ ክም አቶብዩ ወየመን አሰክ ኤረትሮ ለትዐደ አንበጣ ሻብብ ዐሊ። ሕኩመት ኤረትሮ -ወዛረት ሐርሱ፣ እግል እሊ ወራር አንበጣ ምን ቀዳመ ዱሊት እግሉ ሰበት ጸንሐት፣ ዲብ ነፍር ለመጽአዩ፣ እብ ሽዐቡ ዲሽ ወእዳራተ፣ እት ሐርሱ መደረት እንዴ ኢወዴ፣ እብ መካይን ወነሐር አዳም ደወ ረሽረሽት ዲቡ ከአብዴቱ።

እሊ እንበጣ ዮም ዓመት እት አቶብዩ፣ ኬንዩ ግብለት-ሱዳን፣ሶማሊዩ፣ ኡጋንዳ፣ ታንዛንዳ፣ ምን መዐደይ በሐር ህዩ፣ እት የመን፣ በሕገ፣ ቀጠር፣ ሰዐድዩ፣ ኢራን ወክዬን፣ ምን ግብለታይ አሰያመ እት ከረ ህንድ ወፓኪሰታን ርኡይ ክም ሀሊ፣ ተቃሪር እድንያይት መዝመት ነብረ (FAO) ለአክድ።

ምናተ፣ ለዛህረት አንበጣ፣ እት



ሰዋሕል ኤረትሮ ወክሱሰን እት በሐር ለልትሓደድ አቃሊም ቅብለት ወግብለት በሐር ቀየሕ ለልአፈርህ ምን ጉብኤ፣ እትሊ ወክድ ጎነ ዲብ ቅብለት በሐር ቀየሕ፣ እት ሽዕብ፣ ዙሉ-አፍተ፣ ግልቡብ ወግራት ንቃዋ ጋብሆት እንበጣ እንዴ ከሰተት፣ ወዛረት ሐርሱ ህዩ ሰብ መቅደረት፣ መካይን፣ ደወ ወኩሉ ለልአትሐዜ ሐብሬታት እት ተህይብ ወተአትፈርር፣ ምስል እዳራት ወሽዐብ ተሓርቡ ህሌት።

ዲብሊ ሐልፈ አውካድ ቅሩብ እት ሰለሰ ምዴርየት በሀለት፣ ሽዕብ፣ አፍዐበት ወቅሮሬ፣ ቴለል አንበጣ ከአፎ ክም ሀሊ እግል ንወሰቅ።

ምስል ሰብ መቅደረት ወዛረት ሐርሱ ምን ጀሪደት፣ ተለፍዝዮን ወራድዮ ትግራይት ለትፋገረው ሰሕፍዩን፣ ምስል ሰካንሊ ምዴርየት፣ ሰብ መቅደረት፣ እዳራት ወሐረሰቶት ህድግ ዋድያም ዐልነ፣ ከእግል ዮም፣ ሰካን ሽዕብ እት ወቀይ ዳፍያት አንበጣ ሚ ወዱ ክም ህለው እግል ንክተብ እልኩም ቱ፣ ቅራኣት በኪተት።

ሰካን ሽዕብ ምስል ምጽኣት ዝላም ሰሕል፣ ምን ወሬሕ ሰብተምበር ወሐር ቶም እብ ውሐዝ ወዝላም ለልሐርሱ፣ ግርሆም እብ ባርታታት ኩፋል ቱ። ዐግምት ወጀሪፍ ህዩ ለልሙድ አግቡይ ከሬዕ ማይ ቱ። እሊ አግቡይ ክርዐት ማይ ምስል አግቡይ ሐርሶም እንዴ ትወሰክ፣ ዋወር ሐርሱ ልትነፍያ እግል ኒበል እንቀድር።

ክምን ሰካን ሽዕብ ገድገድ አሰይድ መሐመድ ኖር ሳልሕ እግላ እት ባኩዮም ግረህ ወብቅል ብዕድ እግል ለአብዴ ለቀድር አንበጣ ከአፎ ካፍሕወ ክም ህለው እት ሽሬሕ።



“ ሽዐብን ክምለ እት ንዳል ሰለሕ እብ መዐጸሙ ለሓረብ ከዲብ አባዩ ለትዐወተ፣ አዜመ አንበጣ ምን መጽአዩ፣ እክሉ፣ ሰዐሩ ወዕጪዩ እግል ልዕቀብ፣ ለመጽአዩ ወራር አንበጣ እብ መዕጸም ካፍሐ ሀሊ። ሕነ ክምለ እት ግዋሬነ ለረኡናሁ እብ አቅሹን

እንበጣት እደይ እግላ ሽዐብ እንዴ ሀበተኑ ልጃንላ ሐርሱ እግላ ሽዐብ እብ ባርታታት እንዴ ካፈለቱ፣ ተአሽቅዩ። ዳሕዩት ገድገድ ህዩ እት ሰማን ባርተ ንዙማም ሰበት ሕክ፣ እናቢብ እደይ እብ እት መካይን ለኢበጽሐ ዲብ ደረጀት ነፈር እንዴ ኢበጹሕ ዐታብ ዲብ ሀሊ ነአብድዩ። ምን እብ መካይን ለልትረሽረሽ ምድር ህዩ፣ ለእብ ሽዐብ ልትረሽረሽ በዜሕ” ልብል።

ለዋው በሐር እግል ወሊድ አንበጣ ውጡይ ሰበት ቱ። ሽዐብ ምዴርየት ሽዕብ እግላ ወራር አንበጣ ዲመ ልታኸወ ወለአፈርሆም። ዱሉያም ሰበት ጸንሐወ ህዩ፣ ዶል ለዛህረት አንበጣ ልርኡተ፣ ለሐብሬ ምን ሽዐብ እት መክተብ ሐርሱ ትመጽእ ወለአርድ እንዴ ትገነሐ፣ እብ ፊራሮ ሕበር፣ ሕኩመቶም ወሽዐም ምስል ክም ቀንጾ ዲቡ ከልትዐወቶ አሰይድ አሕመድ ባይራይ ወዴሕ።

ምን ሰካን መንሸብ እት ታየናት አንበጣ ወልጅነትግረህ ለከድም አቡነ ዕጁል ዐሊ ሽሌላይ፣ “ለነፍር



አሰይድ አሕመድ ባይራይ

አንበጣ ህዩ አባይ ሕበር ቱ። እብ ብሕቶት ልግበእ ወእብ ዕሽል ህዩ ልትሐረክ።

አሰይድ አሕመድ ባይራይ ህዩ ዶር ወዛረት ሐርሱ እት አብደዮት አንበጣ እት ሽሬሕ። “ ወዛረት ሐርሱ እሊ አንበጣ ብቅልን እንዴ አብደ ዲብ እት ደረር እግል ኢለአጅሬ፣ ምን ጽባብሐ ምስል ሽዐብ እንዴ ጉብኣት እብ ረሻሻት መካይን ትቃትሉ። መካይን ለኢለአትየ ህዩ።

አንበጣ ምን ጀህት ግብለት ዮም 15 ዲሰምበር መጽኢን ወእብ መካይን እት ሽዕብ ቀጢን ወዛረት ሐርሱ እብ ሰብ መቅደረት ረሽቱ ከአብዴቱ። ሐቆህ አናቢብ ረሽ-እዴ እብ እት መካይን ለኢበጽሐ አማክን ሽዕብ ቀጢን፣ ኪሎ ወእዴ አጠል (ምን ገጽ ሐር) እብ ክልኤ መጅሙዐት ተአደድነ እቱ ወአሰክ ዮም 30 ዲሰምበር 2019 እብ እሳት ወሐጸ አብዴናሁ። ሐቆህ 20 እንብብት ረሽሾት ሀበውኒ ወዲብ ቲሉክ ወሽዕብ ቀጢን እብ ሽዐብዩ ርሽረሽ እብ አቱናሁ። እት ደረጀት ዐታብ እንዴ ሀሊ ህዩ እንቀትሉ ህሌ፣ አክል ሕድ ህዩ ተዐወትኑ፣ አዜ ታርፍ ለሀሊ ሰኒ ሐድ ምኑ ቱ” እት ልብል። ምን ሰም አንበጣ እግል ልትደገን፣ ወዛረት ሐርሱ ኮርሱ ክም ሀበቶም፣ ሐቆህ ህዩ ከማማት፣ ጅዌንትያት ወልባሰ ክም ሀበቶም አፍሀሚን። ለልትረሽረሽ አራዲ አዳም



አሰይድ መሐመድኖር ሳሌሕ

ወንዋይ እግል ኢልአተዩ፣ ማይ እግል ኢልትሰመም፣ ሰዐር ወእክል፣ እሰልፍ ብሂመት ወአዳም ክም ለአነክሶ ምኑ፣ ወሐር አሰክ ሳምን ንዋይ ክም ኢከሰኦ እቱ ሰካን ሽዕብ ወደሐው እግልነ። አንበጣ ዲብ ቀትል፣ ለብዕድ መክሉቃት እግል ልተምተም ሰበት አለቡ።

እት መክተብ ፈሬዕ ወዛረት ሐርሱ ምዴርየት ሽዕብ በዐል መቅደረት ካፍሐት-ብቅል መሐመድ ዐሊ ዳፍእ እብ ክሱሰለ እት ምዴርየት ፈሬዕ ወዛረት ሐርሱ ወሽዐብ እግል በደ አንበጣ ወድወ ለህለው ጅህድ ሰኣላት ቅዱማም እቱ ዐልነ።

ሰኣል፣ እግል በደ አንበጣ ሚ ከዋዋት እብ ጀህት ወዛረት ሐርሱ ወሰብ-ሽርኩተ ልትነሰኦ ሀሊ?

በሊሱ፣ እሊ አንበጣ እግል ነአብዴ፣ ምን መሐመድ ዐሊ ዳፍእ ወሬሕ ዲሰምበር እንክድም ህሌ፣ ሳኪን ዶልክ እብ እንክር ዎሮት ልትወለድ ሰበት ህሌ፣ እብ ሐቱ ኢነት እግል ተአንድፋ ኢትቀድር። ወላመ እንሸቄ ዲቡ ምድር ፋዩሕ ቱ። አሰክ ገሕረት፣ ዘቢራይት፣ ሽበርቅ ወበሐረኒ (ወቂሮ) ለሰልፍ ሽበ እብ አማክን ቱ።

ሰኣል፣ ለአንበጣ እብ ሰም እግል ትርሸሹ ለጅብረክ ብዝሐሁ ወመደቅቡቱ ወለግማሩ?

በሊሱ፣ ደቅቡ ውበዝሐሁ፣ ክምሰልሁም ዓማሩ ሰም አንበጣ እግል ትረሸሽ ቀሰበክ። ሳኪን እት ዓማሩ፣ ምን 3ይት ደረጀት ወለዐል ሐቆ ሀሊ ርሸሹ ልብል ለዕሉም።

ሰኣል፣ ምን ጠባይዕ ዐንበጣ ለልአትፈክር ሚ ሀሊ?

በሊሱ፣ አንበጣ፣ ዕምር ነፊሩ ምን ራቤዕ ውሓምስ ደረጀት ወለዐል ቱ። አሰክ እሊ ዕምር እሊ፣ ሐሊት ለልሀይቡ ሽቤሕ ከዘን። ዐደድ ለእቱ ሐሽም ተምም ከነፍርመ ለአምሩ። ለእቱ ሀሊ ምድር ኢዐብረ ከኢሰፍረ ወዘሕዋታት ኢወደ እቱ ምን ጉብእ ወዐደድ ሐሽም ታምም ኢሀለ ምን ጉብእ፣ እት ለሀሊ እቱ ባኩት ነብር። ምን ጠባይዕ ለተአትፈክር ህዩ፣ እት ዐስተር ዲብ ለዐሰስ ምን 15-17 ሳዐት እት ሰመ ከልእ። በሐር ልትዐዴ ዲብ ሀሊ፣ ምድር መስ እቱ ምን ጉብእ ወእግል ለዓርፍ ሐዘ ምን ጉብእ፣ ለተብዕን እት ረአሰለ ማይ-ብሐር ልትከረው፣ ወለአንሳት እት ዐየጸሊም ልትሐዘለ እቶም። እትሊ ወክድ እሊ፣ ምን ተብዕን እሰትሸሃድ ብዘሕ ጀላብለ አንሳት ልትደፈዕ። ዕሽል-አንበጣ እት ሄራሩ ዐደድ ብዘሕ እት መይት ምኑ ልግዕዝ። መሳሳት ረዩም ህዩ በትክ።

ሰኣል፣ ዲብ ምዴርየት ሽዕብ አዜ ዲብ አክል አዩ ምድር አንበጣ ትራቅቦ ህሌኩም?

በሊሱ፣ ሕነ ለእንሸቄ ዲብ አርደት ምዴርየት ሽዕብ፣ 15,000 ሄክታር ትጉብእ።

ሰኣል፣ እት አግዳም በሐርን ለልትፋሬ ሀሊ አንበጣ ሚ አጅናሰ ቱ።

በሊሱ፣ ክልኤ ፊኣት ቱ። በናቢን ለነብር (Solitary) ወእብ ዕሽል ለነብር (Gregarious) ልትበህል።

ሰኣል፣ ሐቱ አምቤጠት ከም ቤጪት ትወልድ?

በሊሱ፣ ምን 90-160 ቤጪት ትወልድ።

ሰኣል፣ ቤጪት አንበጣ እት ከም ትትፈንቀሕ?

በሊሱ፣ እት 21 አምዕል ትትፈንቀሕ ወእት አንቤጣይ ንኡሽ ትትጠወር።

ሰኣል፣ አሰክ ነፊር በጹሕ አክል-አዩ ወቅት ለአትሐዝዩ?

በሊሱ፣ እት ደረጀት1 ሳምን፣ እት ደረጀት2 ሳምን፣ እት ደረጀት3 ሳምን፣ እት ደረጀት4 ሳምን ወእት ደረጀት5 ከማን ሳምን ዲብ ተጠውር አሰክ ነፊር በጹሕ። እት ሐምስ ሳምን እት ነፊር (Flight) እግል ልብጸሕ ቀድር።

ሰኣል፣ እት ፍሬ አው ዐሊብ ለበጹሕ እቱ ዕምር ህዩ ከም ቱ?

በሊሱ፣ እት ክልኣት ወሬሕ በጽሕ-ታምም (Mature Adult) እግል ልብጸሕ ቀድር።